

॥ श्री राम चरित मानस ॥

.. Shri Ram Charit Manas ..

sanskritdocuments.org

August 20, 2017

.. Shri Ram Charit Manas ..

॥ श्री राम चरित मानस ॥

Sanskrit Document Information



Text title : Shri Ram Charit Manas - uttarakand

File name : manas7_i.itx

Category : raama, tulasIdAsa

Location : doc_z_otherlang_hindi

Author : Goswami Tulasidas

Language : Hindi

Subject : philosophy/hinduism/religion

Transliterated by : Mr. Balram J. Rathore, Ratlam, M.P., a retired railway driver

Description-comments : Awadhi, Converted from ISCII to ITRANS

Acknowledge-Permission: Dr. Vineet Chaitanya, vc@iiit.net

Latest update : March 12, 2015

Send corrections to : Sanskrit@cheerful.com

Site access : <http://sanskritdocuments.org>

This text is prepared by volunteers and is to be used for personal study and research. The file is not to be copied or reposted without permission, for promotion of any website or individuals or for commercial purpose.

Please help to maintain respect for volunteer spirit.

August 20, 2017

sanskritdocuments.org

॥ श्री राम चरित मानस ॥

श्री गणेशाय नमः

श्रीजानकीवल्लभो विजयते

श्रीरामचरितमानस

सप्तम सोपान

(उत्तरकाण्ड)

श्लोक

केकीकण्ठाभनीलं सुरवरविलसद्विप्रपादाब्जचिह्नं
शोभाढ्यं पीतवस्त्रं सरसिजनयनं सर्वदा सुप्रसन्नम् ।
पाणौ नाराचचापं कपिनिकरयुतं बन्धुना सेव्यमानं
नौमीढ्यं जानकीशं रघुवरमनिशं पुष्पकारूढरामम् ॥ १ ॥

कोसलेन्द्रपदकञ्जमञ्जुलौ कोमलावजमहेशवन्दितौ ।
जानकीकरसरोजलालितौ चिन्तकस्य मनभृङ्गसङ्गिनौ ॥ २ ॥

कुन्दइन्दुदरगौरसुन्दरं अम्बिकापतिमभीष्टसिद्धिदम् ।
कारुणीककलकञ्जलोचनं नौमि शंकरमनंगमोचनम् ॥ ३ ॥

दो. रहा एक दिन अवधि कर अति आरत पुर लोग ।

जहँ तहँ सोचहिं नारि नर कृस तन राम बियोग ॥

सगुन होहिं सुंदर सकल मन प्रसन्न सब केर ।

प्रभु आगवन जनाव जनु नगर रम्य चहुँ फेर ॥

कौसल्यादि मातु सब मन अनंद अस होइ ।

आयउ प्रभु श्री अनुज जुत कहन चहत अब कोइ ॥

भरत नयन भुज दच्छिन फरकत बारहिं बार ।

जानि सगुन मन हरष अति लागे करन बिचार ॥

रहेउ एक दिन अवधि अधारा। समुझत मन दुख भयउ अपारा ॥

कारन कवन नाथ नहिं आयउ। जानि कुटिल किधौं मोहि बिसरायउ ॥

अहह धन्य लछिमन बडभागी। राम पदारबिंदु अनुरागी ॥

कपटी कुटिल मोहि प्रभु चीन्हा। ताते नाथ संग नहिं लीन्हा ॥

जौं करनी समुझै प्रभु मोरी। नहिं निस्तार कलप सत कोरी ॥

जन अवगुन प्रभु मान न काऊ। दीन बंधु अति मृदुल सुभाऊ ॥

मोरि जियँ भरोस दृढ सोई। मिलिहहिँ राम सगुन सुभ होई ॥
बीतें अवधि रहहि जौँ प्राना। अधम कवन जग मोहि समाना ॥

दो. राम बिरह सागर महँ भरत मगन मन होत।

विप्र रूप धरि पवन सुत आइ गयउ जनु पोत ॥ १(क) ॥

बैठि देखि कुसासन जटा मुकुट कृस गात।

राम राम रघुपति जपत स्रवत नयन जलजात ॥ १(ख) ॥

देखत हनुमान अति हरषेउ। पुलक गात लोचन जल बरषेउ ॥
मन महँ बहुत भाँति सुख मानी। बोलेउ श्रवन सुधा सम बानी ॥
जासु बिरहँ सोचहु दिन राती। रटहु निरंतर गुन गन पाँती ॥
रघुकुल तिलक सुजन सुखदाता। आयउ कुसल देव मुनि त्राता ॥
रिपु रन जीति सुजस सुर गावत। सीता सहित अनुज प्रभु आवत ॥
सुनत बचन बिसरे सब दूखा। तृषावंत जिमि पाइ पियूषा ॥
को तुम्ह तात कहाँ ते आए। मोहि परम प्रिय बचन सुनाए ॥
मारुत सुत मैं कपि हनुमाना। नामु मोर सुनु कृपानिधाना ॥
दीनबंधु रघुपति कर किंकर। सुनत भरत भँटेउ उठि सादर ॥
मिलत प्रेम नहिँ हृदयँ समाता। नयन स्रवत जल पुलकित गाता ॥
कपि तव दरस सकल दुख बीते। मिले आजु मोहि राम पिरीते ॥
बार बार बूझी कुसलाता। तो कहूँ देउँ काह सुनु भ्राता ॥
एहि संदेस सरिस जग माहीं। करि बिचार देखेउँ कछु नाहीं ॥
नाहिन तात उरिन मैं तोही। अब प्रभु चरित सुनावहु मोही ॥
तब हनुमंत नाइ पद माथा। कहे सकल रघुपति गुन गाथा ॥
कहु कपि कबहुँ कृपाल गोसाई। सुमिरहिँ मोहि दास की नाई ॥

छं. निज दास ज्यों रघुवंसभूषन कबहुँ मम सुमिरन करू यो।

सुनि भरत बचन बिनीत अति कपि पुलकित तन चरनन्हि परू यो ॥

रघुबीर निज मुख जासु गुन गन कहत अग जग नाथ जो।

काहे न होइ बिनीत परम पुनीत सदगुन सिंधु सो ॥

दो. राम प्रान प्रिय नाथ तुम्ह सत्य बचन मम तात।

पुनि पुनि मिलत भरत सुनि हरष न हृदयँ समात ॥ २(क) ॥

सो. भरत चरन सिरु नाइ तुरित गयउ कपि राम पहिँ।

कही कुसल सब जाइ हरषि चलेउ प्रभु जान चढि ॥ २(ख) ॥

हरषि भरत कोसलपुर आए। समाचार सब गुरहि सुनाए ॥
 पुनि मंदिर महुँ बात जनाई। आवत नगर कुसल रघुराई ॥
 सुनत सकल जननीं उठि धाई। कहि प्रभु कुसल भरत समुझाई ॥
 समाचार पुरबासिन्ह पाए। नर अरु नारि हरषि सब धाए ॥
 दधि दुर्बा रोचन फल फूला। नव तुलसी दल मंगल मूला ॥
 भरि भरि हेम थार भामिनी। गावत चलिं सिंधु सिंधुरगामिनी ॥
 जे जैसेहिं तैसेहिं उटि धावहिं। बाल बृद्ध कहँ संग न लावहिं ॥
 एक एकन्ह कहँ बूझहिं भाई। तुम्ह देखे दयाल रघुराई ॥
 अवधपुरी प्रभु आवत जानी। भई सकल सोभा कै खानी ॥
 बहइ सुहावन त्रिविध समीरा। भइ सरजू अति निर्मल नीरा ॥

दो. हरषित गुर परिजन अनुज भूसुर बृंद समेत।

चले भरत मन प्रेम अति सन्मुख कृपानिकेत ॥ ३(क) ॥

बहुतक चढी अटारिन्ह निरखहिं गगन विमान।

देखि मधुर सुर हरषित करहिं सुमंगल गान ॥ ३(ख) ॥

राका ससि रघुपति पुर सिंधु देखि हरषान।

बढयो कोलाहल करत जनु नारि तरंगो समान ॥ ३(ग) ॥

इहाँ भानुकुल कमल दिवाकर। कपिन्ह देखावत नगर मनोहर ॥

सुनु कपीस अंगद लंकेसा। पावन पुरी रुचिर यह देसा ॥

जद्यपि सब वैकुंठ बखाना। वेद पुरान बिदित जगु जाना ॥

अवधपुरी सम प्रिय नहिं सोऊ। यह प्रसंग जानइ कोउ कोऊ ॥

जन्मभूमि मम पुरी सुहावनि। उत्तर दिसि बह सरजू पावनि ॥

जा मज्जन ते बिनहिं प्रयासा। मम समीप नर पावहिं बासा ॥

अति प्रिय मोहि इहाँ के बासी। मम धामदा पुरी सुख रासी ॥

हरषे सब कपि सुनि प्रभु बानी। धन्य अवध जो राम बखानी ॥

दो. आवत देखि लोग सब कृपासिंधु भगवान।

नगर निकट प्रभु प्रेरेउ उतरेउ भूमि विमान ॥ ४(क) ॥

उतरि कहेउ प्रभु पुष्पकहि तुम्ह कुबेर पहिं जाहु।

प्रेरित राम चलेउ सो हरषु बिरहु अति ताहु ॥ ४(ख) ॥

आए भरत संग सब लोगा। कृस तन श्रीरघुबीर बियोगा ॥
 बामदेव बसिष्ठ मुनिनायक। देखे प्रभु महि धरि धनु सायक ॥
 धाइ धरे गुर चरन सरोरुह। अनुज सहित अति पुलक तनोरुह ॥
 भेंटि कुसल बूझी मुनिराया। हमरें कुसल तुम्हारिहिं दाय ॥
 सकल द्विजन्ह मिलि नायउ माथा। धर्म धुरंधर रघुकुलनाथा ॥
 गहे भरत पुनि प्रभु पद पंकज। नमत जिन्हहि सुर मुनि संकर अज ॥
 परे भूमि नहिं उठत उठाए। बर करि कृपासिंधु उर लाए ॥
 स्यामल गात रोम भए ठाढे। नव राजीव नयन जल बाढे ॥

छं. राजीव लोचन ख्रवत जल तन ललित पुलकावलि बनी।
 अति प्रेम हृदयँ लगाइ अनुजहि मिले प्रभु त्रिभुअन धनी ॥
 प्रभु मिलत अनुजहि सोह मो पहिं जाति नहिं उपमा कही।
 जनु प्रेम अरु सिंगार तनु धरि मिले बर सुषमा लही ॥ १ ॥

बूझत कृपानिधि कुसल भरतहि बचन वेगि न आवई।
 सुनु सिवा सो सुख बचन मन ते भिन्न जान जो पावई ॥
 अब कुसल कौसलनाथ आरत जानि जन दरसन दियो।
 बूडत विरह बारीस कृपानिधान मोहि कर गहि लियो ॥ २ ॥

दो. पुनि प्रभु हरषि सत्रुहन भेंटे हृदयँ लगाइ।
 लछिमन भरत मिले तब परम प्रेम दोउ भाइ ॥ ५ ॥

भरतानुज लछिमन पुनि भेंटे। दुसह विरह संभव दुख मेटे ॥
 सीता चरन भरत सिरु नावा। अनुज समेत परम सुख पावा ॥
 प्रभु बिलोकि हरषे पुरबासी। जनित बियोग विपति सब नासी ॥
 प्रेमातुर सब लोग निहारी। कौतुक कीन्ह कृपाल खरारी ॥
 अमित रूप प्रगटे तेहि काला। जथाजोग मिले सबहि कृपाला ॥
 कृपादृष्टि रघुबीर बिलोकी। किए सकल नर नारि बिसोकी ॥
 छन महि सबहि मिले भगवाना। उमा मरम यह काहुँ न जाना ॥
 एहि विधि सबहि सुखी करि रामा। आगें चले सील गुन धामा ॥
 कौसल्यादि मातु सब धाई। निरखि बच्छ जनु धेनु लवाई ॥

छं. जनु धेनु बालक बच्छ तजि गृहँ चरन बन परबस गई।

दिन अंत पुर रुख ख्रवत थन हुंकार करि धावत भई ॥
अति प्रेम सब मातु भेटीं बचन मृदु बहुविधि कहे।
गइ विषम बियोग भव तिन्ह हरष सुख अगनित लहे ॥

दो. भेटेउ तनय सुमित्राँ राम चरन रति जानि।
रामहि मिलत कैकेई हृदयँ बहुत सकुचानि ॥ ६(क) ॥

लछिमन सब मातन्ह मिलि हरषे आसिष पाइ।
कैकेइ कहँ पुनि पुनि मिले मन कर छोभु न जाइ ॥ ६ ॥

सासुन्ह सबनि मिली बैदेही। चरनन्हि लागि हरषु अति तेही ॥
देहिं असीस बूझि कुसलाता। होइ अचल तुम्हार अहिवाता ॥
सब रघुपति मुख कमल बिलोकहिं। मंगल जानि नयन जल रोकहिं ॥
कनक थार आरति उतारहिं। बार बार प्रभु गात निहारहिं ॥
नाना भाँति निछावरि करहीं। परमानंद हरष उर भरहीं ॥
कौसल्या पुनि पुनि रघुबीरहि। चितवति कृपासिंधु रनधीरहि ॥
हृदयँ बिचारति बारहिं बारा। कवन भाँति लंकापति मारा ॥
अति सुकुमार जुगल मेरे बारे। निसिचर सुभट महाबल भारे ॥

दो. लछिमन अरु सीता सहित प्रभुहि बिलोकति मातु।
परमानंद मगन मन पुनि पुनि पुलकित गातु ॥ ७ ॥

लंकापति कपीस नल नीला। जामवंत अंगद सुभसीला ॥
हनुमदादि सब बानर बीरा। धरे मनोहर मनुज सरीरा ॥
भरत सनेह सील व्रत नेमा। सादर सब बरनहिं अति प्रेमा ॥
देखि नगरबासिन्ह कै रीती। सकल सराहहि प्रभु पद प्रीती ॥
पुनि रघुपति सब सखा बोलाए। मुनि पद लागहु सकल सिखाए ॥
गुर वसिष्ठ कुलपूज्य हमारे। इन्ह की कृपाँ दनुज रन मारे ॥
ए सब सखा सुनहु मुनि मेरे। भए समर सागर कहँ बेरे ॥
मम हित लागि जन्म इन्ह हारे। भरतहु ते मोहि अधिक पिआरे ॥
सुनि प्रभु बचन मगन सब भए। निमिष निमिष उपजत सुख नए ॥

दो. कौसल्या के चरनन्हि पुनि तिन्ह नायउ माथ ॥
आसिष दीन्हे हरषि तुम्ह प्रिय मम जिमि रघुनाथ ॥ ८(क) ॥
सुमन वृष्टि नभ संकुल भवन चले सुखकंद।

चढी अटारिन्ह देखहिं नगर नारि नर बृंद ॥ ८(ख) ॥

कंचन कलस बिचित्र सँवारे। सबहिं धरे सजि निज निज द्वारे ॥
 बंदनवार पताका केतू। सबन्हि बनाए मंगल हेतू ॥
 बीथीं सकल सुगंध सिंचाई। गजमनि रचि बहु चौक पुराई ॥
 नाना भाँति सुमंगल साजे। हरषि नगर निसान बहु बाजे ॥
 जहँ तहँ नारि निछावर करहीं। देहिं असीस हरष उर भरहीं ॥
 कंचन थार आरती नाना। जुबती सजें करहिं सुभ गाना ॥
 करहिं आरती आरतिहर कें। रघुकुल कमल बिपिन दिनकर कें ॥
 पुर सोभा संपति कल्याना। निगम सेष सारदा बखाना ॥
 तेउ यह चरित देखि ठगि रहहीं। उमा तासु गुन नर किमि कहहीं ॥

दो. नारि कुमुदिनीं अवध सर रघुपति बिरह दिनेस।

अस्त भएँ विगसत भई निरखि राम राकेस ॥ ९(क) ॥

होहिं सगुन सुभ बिबिध बिधि बाजहिं गगन निसान।

पुर नर नारि सनाथ करि भवन चले भगवान ॥ ९(ख) ॥

प्रभु जानी कैकेई लजानी। प्रथम तासु गृह गए भवानी ॥
 ताहि प्रबोधि बहुत सुख दीन्हा। पुनि निज भवन गवन हरि कीन्हा ॥
 कृपासिंधु जब मंदिर गए। पुर नर नारि सुखी सब भए ॥
 गुर बसिष्ट द्विज लिए बुलाई। आजु सुघरी सुदिन समुदाई ॥
 सब द्विज देहु हरषि अनुसासन। रामचंद्र बैठहिं सिंघासन ॥
 मुनि बसिष्ट के बचन सुहाए। सुनत सकल विप्रन्ह अति भाए ॥
 कहहिं बचन मृदु विप्र अनेका। जग अभिराम राम अभिषेका ॥
 अब मुनिवर बिलंब नहिं कीजे। महाराज कहँ तिलक करीजे ॥

दो. तब मुनि कहेउ सुमंत्र सन सुनत चलेउ हरषाइ।

रथ अनेक बहु बाजि गज तुरत सँवारे जाइ ॥ १०(क) ॥

जहँ तहँ धावन पठइ पुनि मंगल द्रव्य मगाइ।

हरष समेत बसिष्ट पद पुनि सिरु नायउ आइ ॥ १०(ख) ॥

नवान्हपारायण, आठवाँ विश्राम

अवधपुरी अति रुचिर बनाई। देवन्ह सुमन वृष्टि झरि लाई ॥
 राम कहा सेवकन्ह बुलाई। प्रथम सखन्ह अन्हवावहु जाई ॥

सुनत बचन जहँ तहँ जन धाए। सुग्रीवादि तुरत अन्हवाए ॥
 पुनि करुनानिधि भरतु हँकारे। निज कर राम जटा निरुआरे ॥
 अन्हवाए प्रभु तीनिउ भाई। भगत बछल कृपाल रघुराई ॥
 भरत भाग्य प्रभु कोमलताई। सेष कोटि सत सकहिं न गाई ॥
 पुनि निज जटा राम बिबराए। गुर अनुसासन मागि नहाए ॥
 करि मज्जन प्रभु भूषन साजे। अंग अनंग देखि सत लाजे ॥

दो. सासुन्ह सादर जानकिहि मज्जन तुरत कराइ।
 दिव्य बसन बर भूषन अँग अँग सजे बनाइ ॥ ११(क) ॥
 राम बाम दिसि सोभति रमा रूप गुन खानि।
 देखि मातु सब हरषीं जन्म सुफल निज जानि ॥ ११(ख) ॥
 सुनु खगेस तेहि अवसर ब्रह्मा सिव मुनि वृंद।
 चट्टि बिमान आए सब सुर देखन सुखकंद ॥ ११(ग) ॥

प्रभु बिलोकि मुनि मन अनुरागा। तुरत दिव्य सिंघासन मागा ॥
 रवि सम तेज सो बरनि न जाई। बैठे राम द्विजन्ह सिरु नाई ॥
 जनकसुता समेत रघुराई। पेरि प्रहरषे मुनि समुदाई ॥
 बेद मंत्र तब द्विजन्ह उचारे। नभ सुर मुनि जय जयति पुकारे ॥
 प्रथम तिलक बसिष्ट मुनि कीन्हा। पुनि सब विप्रन्ह आयसु दीन्हा ॥
 सुत बिलोकि हरषीं महतारी। बार बार आरती उतारी ॥
 विप्रन्ह दान बिबिध विधि दीन्हे। जाचक सकल अजाचक कीन्हे ॥
 सिंघासन पर त्रिभुअन साई। देखि सुरन्ह दुंदुभीं बजाई ॥

छं. नभ दुंदुभीं बाजहिं बिपुल गंधर्ब किंनर गावहीं।
 नाचहिं अपछरा वृंद परमानंद सुर मुनि पावहीं ॥
 भरतादि अनुज विभीषनांगद हनुमदादि समेत ते।
 गहँ छत्र चामर व्यजन धनु असि चर्म सक्ति विराजते ॥ १ ॥
 श्री सहित दिनकर वंस बूषन काम बहु छवि सोहई।
 नव अंबुधर बर गात अंबर पीत सुर मन मोहई ॥
 मुकुटांगदादि बिचित्र भूषन अंग अंगन्हि प्रति सजे।
 अंभोज नयन बिसाल उर भुज धन्य नर निरखंति जे ॥ २ ॥

दो. वह सोभा समाज सुख कहत न बनइ खगेस।

बरनहिं सारद सेष श्रुति सो रस जान महेस ॥ १२(क) ॥

भिन्न भिन्न अस्तुति करि गए सुर निज निज धाम।

बंदी बेष बेद तब आए जहँ श्रीराम ॥ १२(ख) ॥

प्रभु सर्वग्य कीन्ह अति आदर कृपानिधान।

लखेउ न काहँ मरम कछु लगे करन गुन गान ॥ १२(ग) ॥

छं. जय सगुन निर्गुन रूप अनूप भूप सिरोमने।

दसकंधरादि प्रचंड निसिचर प्रबल खल भुज बल हने ॥

अवतार नर संसार भार बिभंजि दारुन दुख दहे।

जय प्रनतपाल दयाल प्रभु संजुक्त सक्ति नमामहे ॥ १ ॥

तव विषम माया बस सुरासुर नाग नर अग जग हरे।

भव पंथ भ्रमत अमित दिवस निसि काल कर्म गुननि भरे ॥

जे नाथ करि करुना बिलोके त्रिविधि दुख ते निर्बहे।

भव खेद छेदन दच्छ हम कहँ रच्छ राम नमामहे ॥ २ ॥

जे ग्यान मान बिमत्त तव भव हरनि भक्ति न आदरी।

ते पाइ सुर दुर्लभ पदादपि परत हम देखत हरी ॥

बिस्वास करि सब आस परिहरि दास तव जे होइ रहे।

जपि नाम तव बिनु श्रम तरहिं भव नाथ सो समरामहे ॥ ३ ॥

जे चरन सिव अज पूज्य रज सुभ परसि मुनिपतिनी तरी।

नख निर्गता मुनि बंदिता त्रेलोक पावनि सुरसरी ॥

ध्वज कुलिस अंकुस कंज जुत बन फिरत कंटक किन लहे।

पद कंज द्वंद मुकुंद राम रमेस नित्य भजामहे ॥ ४ ॥

अव्यक्तमूलमनादि तरु त्वच चारि निगमागम भने।

षट कंध साखा पंच बीस अनेक पर्न सुमन घने ॥

फल जुगल बिधि कटु मधुर बेलि अकेलि जेहि आश्रित रहे।

पल्लवत फूलत नवल नित संसार विटप नमामहे ॥ ५ ॥

जे ब्रह्म अजमद्वैतमनुभवगम्य मनपर ध्यावहीं।

ते कहहुँ जानहुँ नाथ हम तव सगुन जस नित गावहीं ॥

करुनायतन प्रभु सदगुनाकर देव यह बर मागहीं।

मन बचन कर्म विकार तजि तव चरन हम अनुरागहीं ॥ ६ ॥

दो. सब के देखत बेदन्ह बिनती कीन्ह उदार।

अंतर्धान भए पुनि गए ब्रह्म आगार ॥ १३(क) ॥

बैनतेय सुनु संभु तव आए जहँ रघुबीर।

बिनय करत गदगद गिरा पूरित पुलक सरीर ॥ १३(ख) ॥

छं. जय राम रमारमनं समनं। भव ताप भयाकुल पाहि जनं ॥

अवधेस सुरेस रमेस बिभो। सरनागत मागत पाहि प्रभो ॥ १ ॥

दससीस विनासन बीस भुजा। कृत दूरि महा महि भूरि रुजा ॥

रजनीचर बृंद पतंग रहे। सर पावक तेज प्रचंड दहे ॥ २ ॥

महि मंडल मंडन चारुतरं। धृत सायक चाप निषंग बरं ॥

मद मोह महा ममता रजनी। तम पुंज दिवाकर तेज अनी ॥ ३ ॥

मनजात किरात निपात किए। मृग लोग कुभोग सरेन हिए ॥

हति नाथ अनाथनि पाहि हरे। विषया बन पावँर भूलि परे ॥ ४ ॥

बहु रोग बियोगन्हि लोग हए। भवदंघ्रि निरादर के फल ए ॥

भव सिंधु अगाध परे नर ते। पद पंकज प्रेम न जे करते ॥ ५ ॥

अति दीन मलीन दुखी नितहीं। जिन्ह के पद पंकज प्रीति नहीं ॥

अवलंब भवंत कथा जिन्ह के ॥ प्रिय संत अनंत सदा तिन्ह के ॥ ६ ॥

नहिं राग न लोभ न मान मदा ॥ तिन्ह के सम बैभव वा विपदा ॥

एहि ते तव सेवक होत मुदा। मुनि त्यागत जोग भरोस सदा ॥ ७ ॥

करि प्रेम निरंतर नेम लिएँ। पद पंकज सेवत सुद्ध हिएँ ॥

सम मानि निरादर आदरही। सब संत सुखी विचरंति मही ॥ ८ ॥

मुनि मानस पंकज भृंग भजे। रघुबीर महा रनधीर अजे ॥

तव नाम जपामि नमामि हरी। भव रोग महागद मान अरी ॥ ९ ॥

गुन सील कृपा परमायतनं। प्रनमामि निरंतर श्रीरमनं ॥

रघुनंद निकंदय द्वंद्वघनं। महिपाल बिलोकय दीन जनं ॥ १० ॥

दो. बार बार बर मागउँ हरषि देहु श्रीरंग।

पद सरोज अनपायनी भगति सदा सतसंग ॥ १४(क) ॥

बरनि उमापति राम गुन हरषि गए कैलास।

तब प्रभु कपिन्ह दिवाए सब बिधि सुखप्रद बास ॥ १४(ख) ॥

सुनु खगपति यह कथा पावनी। त्रिविध ताप भव भय दावनी ॥
 महाराज कर सुभ अभिषेका। सुनत लहहिं नर बिरति बिबेका ॥
 जे सकाम नर सुनहिं जे गावहिं। सुख संपति नाना बिधि पावहिं ॥
 सुर दुर्लभ सुख करि जग माहीं। अंतकाल रघुपति पुर जाहीं ॥
 सुनहिं विमुक्त बिरत अरु बिषई। लहहिं भगति गति संपति नई ॥
 खगपति राम कथा मैं बरनी। स्वमति बिलास त्रास दुख हरनी ॥
 बिरति बिबेक भगति दृढ करनी। मोह नदी कहँ सुंदर तरनी ॥
 नित नव मंगल कौसलपुरी। हरषित रहहिं लोग सब कुरी ॥
 नित नइ प्रीति राम पद पंकज। सबकें जिन्हहि नमत सिव मुनि अज ॥
 मंगन बहु प्रकार पहिराए। द्विजन्ह दान नाना बिधि पाए ॥

दो. ब्रह्मानंद मगन कपि सब कें प्रभु पद प्रीति।

जात न जाने दिवस तिन्ह गए मास षट बीति ॥ १५ ॥

बिसरे गृह सपनेहुँ सुधि नाहीं। जिमि परद्रोह संत मन माही ॥
 तब रघुपति सब सखा बोलाए। आइ सबन्हि सादर सिरु नाए ॥
 परम प्रीति समीप बैठारे। भगत सुखद मृदु बचन उचारे ॥
 तुम्ह अति कीन्ह मोरि सेवकाई। मुख पर केहि बिधि करौं बडाई ॥
 ताते मोहि तुम्ह अति प्रिय लागे। मम हित लागि भवन सुख त्यागे ॥
 अनुज राज संपति बैदेही। देह गेह परिवार सनेही ॥
 सब मम प्रिय नहिं तुम्हहि समाना। मृषा न कहउँ मोर यह बाना ॥
 सब के प्रिय सेवक यह नीती। मोरें अधिक दास पर प्रीती ॥

दो. अब गृह जाहु सखा सब भजेहु मोहि दृढ नेम।

सदा सर्वगत सर्वहित जानि करेहु अति प्रेम ॥ १६ ॥

सुनि प्रभु बचन मगन सब भए। को हम कहाँ बिसरि तन गए ॥
 एकटक रहे जोरि कर आगे। सकहिं न कछु कहि अति अनुरागे ॥
 परम प्रेम तिन्ह कर प्रभु देखा। कहा बिबिध बिधि ग्यान बिसेषा ॥
 प्रभु सन्मुख कछु कहन न पारहिं। पुनि पुनि चरन सरोज निहारहिं ॥

तव प्रभु भूषन बसन मगाए। नाना रंग अनूप सुहाए ॥
सुग्रीवहि प्रथमहि पहिराए। बसन भरत निज हाथ बनाए ॥
प्रभु प्रेरित लछिमन पहिराए। लंकापति रघुपति मन भाए ॥
अंगद बैठ रहा नहि डोला। प्रीति देखि प्रभु ताहि न बोला ॥

दो. जामवंत नीलादि सब पहिराए रघुनाथ।

हियँ धरि राम रूप सब चले नाइ पद माथ ॥ १७(क) ॥

तब अंगद उठि नाइ सिरु सजल नयन कर जोरि।

अति बिनीत बोलेउ बचन मनहुँ प्रेम रस बोरि ॥ १७(ख) ॥

सुनु सर्वग्य कृपा सुख सिंधो। दीन दयाकर आरत बंधो ॥
मरती बेर नाथ मोहि बाली। गयउ तुम्हारेहि कोछें घाली ॥
असरन सरन बिरदु संभारी। मोहि जनि तजहु भगत हितकारी ॥
मोरें तुम्ह प्रभु गुर पितु माता। जाउँ कहाँ तजि पद जलजाता ॥
तुम्हहि बिचारि कहहु नरनाहा। प्रभु तजि भवन काज मम काहा ॥
बालक ग्यान बुद्धि बल हीना। राखहु सरन नाथ जन दीना ॥
नीचि टहल गृह कै सब करिहउँ। पद पंकज बिलोकि भव तरिहउँ ॥
अस कहि चरन परेउ प्रभु पाही। अब जनि नाथ कहहु गृह जाही ॥

दो. अंगद बचन बिनीत सुनि रघुपति करुना सीव।

प्रभु उठाइ उर लायउ सजल नयन राजीव ॥ १८(क) ॥

निज उर माल बसन मनि बालितनय पहिराइ।

विदा कीन्हि भगवान तब बहु प्रकार समुझाइ ॥ १८(ख) ॥

भरत अनुज सौमित्र समेता। पठवन चले भगत कृत चेता ॥
अंगद हृदयँ प्रेम नहि थोरा। फिरि फिरि चितव राम की ओरा ॥
बार बार कर दंड प्रनामा। मन अस रहन कहहि मोहि रामा ॥
राम बिलोकनि बोलनि चलनी। सुमिरि सुमिरि सोचत हँसि मिलनी ॥
प्रभु रुख देखि बिनय बहु भाषी। चलेउ हृदयँ पद पंकज राखी ॥
अति आदर सब कपि पहुँचाए। भाइन्ह सहित भरत पुनि आए ॥
तब सुग्रीव चरन गहि नाना। भौंति बिनय कीन्हे हनुमाना ॥
दिन दस करि रघुपति पद सेवा। पुनि तव चरन देखिहउँ देवा ॥
पुन्य पुंज तुम्ह पवनकुमारा। सेवहु जाइ कृपा आगारा ॥

अस कहि कपि सब चले तुरंता। अंगद कहइ सुनहु हनुमंता ॥

दो. कहेहु दंडवत प्रभु सैं तुम्हहि कहउँ कर जोरि।

बार बार रघुनायकहि सुरति कराणहु मोरि ॥ १९(क) ॥

अस कहि चलेउ बालिसुत फिरि आयउ हनुमंत।

तासु प्रीति प्रभु सन कहि मगन भए भगवंत ॥ !९(ख) ॥

कुलिसहु चाहि कठोर अति कोमल कुसुमहु चाहि।

चित्त खगेस राम कर समुझि परइ कहु काहि ॥ १९(ग) ॥

पुनि कृपाल लियो बोलि निषादा। दीन्हे भूषन बसन प्रसादा ॥

जाहु भवन मम सुमिरन करेहू। मन क्रम बचन धर्म अनुसरेहू ॥

तुम्ह मम सखा भरत सम भ्राता। सदा रहेहु पुर आवत जाता ॥

बचन सुनत उपजा सुख भारी। परेउ चरन भरि लोचन बारी ॥

चरन नलिन उर धरि गृह आवा। प्रभु सुभाउ परिजनन्हि सुनावा ॥

रघुपति चरित देखि पुरवासी। पुनि पुनि कहहिं धन्य सुखरासी ॥

राम राज बैँठें त्रेलोक। हरषित भए गए सब सोका ॥

बयरु न कर काहू सन कोई। राम प्रताप बिषमता खोई ॥

दो. बरनाश्रम निज निज धरम बनिरत बेद पथ लोग।

चलहिं सदा पावहिं सुखहि नहिं भय सोक न रोग ॥ २० ॥

दैहिक दैविक भौतिक तापा। राम राज नहिं काहुहि ब्यापा ॥

सब नर करहिं परस्पर प्रीती। चलहिं स्वधर्म निरत श्रुति नीती ॥

चारिउ चरन धर्म जग माहीं। पूरि रहा सपनेहुँ अघ नाहीं ॥

राम भगति रत नर अरु नारी। सकल परम गति के अधिकारी ॥

अल्पमृत्यु नहिं कवनिउ पीरा। सब सुंदर सब बिरुज सरीरा ॥

नहिं दरिद्र कोउ दुखी न दीना। नहिं कोउ अबुध न लच्छन हीना ॥

सब निर्दभ धर्मरत पुनी। नर अरु नारि चतुर सब गुनी ॥

सब गुनग्य पंडित सब ग्यानी। सब कृतग्य नहिं कपट सयानी ॥

दो. राम राज नभगेस सुनु सचराचर जग माहिं ॥

काल कर्म सुभाव गुन कृत दुख काहुहि नाहिं ॥ २१ ॥

भूमि सप्त सागर मेखला। एक भूप रघुपति कोसला ॥

भुअन अनेक रोम प्रति जासू। यह प्रभुता कछु बहुत न तासू ॥
सो महिमा समुझत प्रभु केरी। यह बरनत हीनता घनेरी ॥
सोउ महिमा खगेस जिन्ह जानी। फिरी एहि चरित तिन्हहुँ रति मानी ॥
सोउ जाने कर फल यह लीला। कहहिँ महा मुनिबर दमसीला ॥
राम राज कर सुख संपदा। बरनि न सकइ फनीस सारदा ॥
सब उदार सब पर उपकारी। विप्र चरन सेवक नर नारी ॥
एकनारि व्रत रत सब झारी। ते मन बच क्रम पति हितकारी ॥

दो. दंड जतिन्ह कर भेद जहँ नर्तक नृत्य समाज।

जीतहु मनहि सुनिअ अस रामचंद्र केँ राज ॥ २२ ॥

फूलहिँ फरहिँ सदा तरु कानन। रहहिँ एक सँग गज पंचानन ॥
खग मृग सहज बयरु बिसराई। सबन्हि परस्पर प्रीति बढाई ॥
कूजहिँ खग मृग नाना वृंदा। अभय चरहिँ बन करहिँ अनंदा ॥
सीतल सुरभि पवन वह मंदा। गूजत अलि लै चलि मकरंदा ॥
लता बिटप मार्गें मधु चवहीं। मनभावतो धेनु पय स्रवहीं ॥
ससि संपन्न सदा रह धरनी। त्रेताँ भइ कृतजुग कै करनी ॥
प्रगटीं गिरिन्ह बिबिध मनि खानी। जगदातमा भूप जग जानी ॥
सरिता सकल बहहिँ बर बारी। सीतल अमल स्वाद सुखकारी ॥
सागर निज मरजादाँ रहहीं। डारहिँ रत्न तटन्हि नर लहहीं ॥
सरसिज संकुल सकल तडागा। अति प्रसन्न दस दिसा विभागा ॥

दो. विधु महि पूर मयूखन्हि रवि तप जेतनेहि काज।

मार्गें बारिद देहिँ जल रामचंद्र केँ राज ॥ २३ ॥

कोटिन्ह बाजिमेध प्रभु कीन्हे। दान अनेक द्विजन्ह कहँ दीन्हे ॥
श्रुति पथ पालक धर्म धुरंधर। गुनातीत अरु भोग पुरंदर ॥
पति अनुकूल सदा रह सीता। सोभा खानि सुसील विनीता ॥
जानति कृपासिंधु प्रभुताई। सेवति चरन कमल मन लाई ॥
जद्यपि गृहँ सेवक सेवकिनी। विपुल सदा सेवा विधि गुनी ॥
निज कर गृह परिचरजा करई। रामचंद्र आयसु अनुसरई ॥
जेहि विधि कृपासिंधु सुख मानइ। सोइ कर श्री सेवा विधि जानइ ॥
कौसल्यादि सासु गृह माहीं। सेवइ सबन्हि मान मद नाहीं ॥
उमा रमा ब्रह्मादि बंदिता। जगदंबा संततमनिदिता ॥

दो. जासु कृपा कटाच्छु सुर चाहत चितव न सोइ।

राम पदारबिंद रति करति सुभावहि खोइ ॥ २४ ॥

सेवहिं सानकूल सब भाई। राम चरन रति अति अधिकार्ई ॥
 प्रभु मुख कमल बिलोकत रहहीं। कबहुँ कृपाल हमहि कछु कहहीं ॥
 राम करहिं भ्रातन्ह पर प्रीती। नाना भौंति सिखावहिं नीती ॥
 हरषित रहहिं नगर के लोगा। करहिं सकल सुर दुर्लभ भोगा ॥
 अहनिसि बिधिहि मनावत रहहीं। श्रीरघुवीर चरन रति चहहीं ॥
 दुइ सुत सुन्दर सीताँ जाए। लव कुस वेद पुरानन्ह गाए ॥
 दोउ बिजई बिनई गुन मंदिर। हरि प्रतिबिंब मनहुँ अति सुंदर ॥
 दुइ दुइ सुत सब भ्रातन्ह केरे। भए रूप गुन सील घनेरे ॥

दो. ग्यान गिरा गोतीत अज माया मन गुन पार।

सोइ सच्चिदानंद घन कर नर चरित उदार ॥ २५ ॥

प्रातकाल सरऊ करि मज्जन। बैठहिं सभाँ संग द्विज सज्जन ॥
 वेद पुरान बसिष्ट बखानहिं। सुनिहिं राम जद्यपि सब जानहिं ॥
 अनुजन्ह संजुत भोजन करहीं। देखि सकल जननीं सुख भरहीं ॥
 भरत सत्रुहन दोनउ भाई। सहित पवनसुत उपवन जाई ॥
 बृझहिं बैठि राम गुन गाहा। कह हनुमान सुमति अवगाहा ॥
 सुनत बिमल गुन अति सुख पावहिं। बहुरि बहुरि करि बिनय कहावहिं ॥
 सब कें गृह गृह होहिं पुराना। रामचरित पावन बिधि नाना ॥
 नर अरु नारि राम गुन गानहिं। करहिं दिवस निसि जात न जानहिं ॥

दो. अवधपुरी बासिन्ह कर सुख संपदा समाज।

सहस सेष नहिं कहि सकहिं जहँ नृप राम बिराज ॥ २६ ॥

नारदादि सनकादि मुनीसा। दरसन लागि कोसलाधीसा ॥
 दिन प्रति सकल अजोध्या आवहिं। देखि नगरु बिरागु बिसरावहिं ॥
 जातरूप मनि रचित अटारीं। नाना रंग रुचिर गच द्वारीं ॥
 पुर चहुँ पास कोट अति सुंदर। रचे कँगूरा रंग रंग बर ॥
 नव ग्रह निकर अनीक बनाई। जनु घेरी अमरावति आई ॥
 महि बहु रंग रचित गच काँचा। जो बिलोकि मुनिवर मन नाचा ॥

धवल धाम ऊपर नभ चुंबत। कलस मनहुँ रवि ससि दुति निंदत ॥
बहु मनि रचित झरोखा भ्राजहिं। गृह गृह प्रति मनि दीप विराजहिं ॥

छं. मनि दीप राजहिं भवन भ्राजहिं देहरीं विद्रुम रची।
मनि खंभ भीति बिरंचि बिरची कनक मनि मरकत खची ॥
सुंदर मनोहर मंदिरायत अजिर रुचिर फटिक रचे।
प्रति द्वार द्वार कपाट पुरट बनाइ बहु बज्रन्हि खचे ॥

दो. चारु चित्रसाला गृह गृह प्रति लिखे बनाइ।
राम चरित जे निरख मुनि ते मन लेहिं चोराइ ॥ २७ ॥

सुमन बाटिका सबहिं लगाई। विविध भाँति करि जतन बनाई ॥
लता ललित बहु जाति सुहाई। फूलहिं सदा बंसत कि नाई ॥
गुंजत मधुकर मुखर मनोहर। मारुत त्रिविध सदा बह सुंदर ॥
नाना खग बालकन्हि जिआए। बोलत मधुर उडात सुहाए ॥
मोर हंस सारस पारावत। भवननि पर सोभा अति पावत ॥
जहँ तहँ देखहिं निज परिछाहीं। बहु विधि कूजहिं नृत्य कराहीं ॥
सुक सारिका पढावहिं बालक। कहहु राम रघुपति जनपालक ॥
राज दुआर सकल विधि चारू। बीथीं चौहट रूचिर बजारू ॥

छं. बाजार रुचिर न बनइ बरनत वस्तु विनु गथ पाइए।
जहँ भूप रमानिवास तहँ की संपदा किमि गाइए ॥
बैठे बजाज सराफ बनिक अनेक मनहुँ कुबेर ते।
सब सुखी सब सच्चरित सुंदर नारि नर सिसु जरठ जे ॥

दो. उत्तर दिसि सरजू बह निर्मल जल गंभीर।
बाँधे घाट मनोहर स्वल्प पंक नहिं तीर ॥ २८ ॥

दूरि फराक रुचिर सो घाटा। जहँ जल पिअहिं बाजि गज ठाटा ॥
पनिघट परम मनोहर नाना। तहाँ न पुरुष करहिं अस्नाना ॥
राजघाट सब विधि सुंदर बर। मज्जहिं तहाँ बरन चारिउ नर ॥
तीर तीर देवन्ह के मंदिर। चहुँ दिसि तिन्ह के उपबन सुंदर ॥
कहुँ कहुँ सरिता तीर उदासी। बसहिं ग्यान रत मुनि संन्यासी ॥
तीर तीर तुलसिका सुहाई। बृंद बृंद बहु मुनिन्ह लगाई ॥
पुर सोभा कछु बरनि न जाई। बाहेर नगर परम रुचिराई ॥

देखत पुरी अखिल अघ भागा। बन उपवन बापिका तडागा ॥

छं. बापीं तडाग अनूप कूप मनोहरायत सोहहीं।
सोपान सुंदर नीर निर्मल देखि सुर मुनि मोहहीं।
बहु रंग कंज अनेक खग कूजहिं मधुप गुंजारहीं।
आराम रम्य पिकादि खग रव जनु पथिक हंकारहीं ॥

दो. रमानाथ जहँ राजा सो पुर बरनि कि जाइ।
अनिमादिक सुख संपदा रहीं अवध सब छाइ ॥ २९ ॥

जहँ तहँ नर रघुपति गुन गावहिं। बैठि परसपर इहइ सिखावहिं ॥
भजहु प्रनत प्रतिपालक रामहि। सोभा सील रूप गुन धामहि ॥
जलज बिलोचन स्यामल गातहि। पलक नयन इव सेवक त्रातहि ॥
धृत सर रुचिर चाप तूनीरहि। संत कंज बन रवि रनधीरहि ॥
काल कराल ब्याल खगराजहि। नमत राम अकाम ममता जहि ॥
लोभ मोह मृगजूथ किरातहि। मनसिज करि हरि जन सुखदातहि ॥
संसय सोक निबिड तम भानुहि। दनुज गहन घन दहन कृसानुहि ॥
जनकसुता समेत रघुवीरहि। कस न भजहु भंजन भव भीरहि ॥
बहु बासना मसक हिम रासिहि। सदा एकरस अज अबिनासिहि ॥
मुनि रंजन भंजन महि भारहि। तुलसिदास के प्रभुहि उदारहि ॥

दो. एहि विधि नगर नारि नर करहि राम गुन गान।
सानुकूल सब पर रहहि संतत कृपानिधान ॥ ३० ॥

जब ते राम प्रताप खगेसा। उदित भयउ अति प्रबल दिनेसा ॥
पूरि प्रकास रहेउ तिहुँ लोका। बहुतेन्ह सुख बहुतन मन सोका ॥
जिन्हहि सोक ते कहउँ बखानी। प्रथम अबिद्या निसा नसानी ॥
अघ उलूक जहँ तहाँ लुकाने। काम क्रोध कैरव सकुचाने ॥
बिबिध कर्म गुन काल सुभाऊ। ए चकोर सुख लहहिं न काऊ ॥
मत्सर मान मोह मद चोरा। इन्ह कर हुनर न कवनिहुँ ओरा ॥
धरम तडाग ग्यान बिग्याना। ए पंकज बिकसे विधि नाना ॥
सुख संतोष विराग बिबेका। बिगत सोक ए कोक अनेका ॥

दो. यह प्रताप रवि जाकें उर जब करइ प्रकास।
पछिले बाढ़हिं प्रथम जे कहे ते पावहिं नास ॥ ३१ ॥

भ्रातन्ह सहित रामु एक बारा। संग परम प्रिय पवनकुमारा ॥
सुंदर उपबन देखन गए। सब तरु कुसुमित पल्लव नए ॥
जानि समय सनकादिक आए। तेज पुंज गुन सील सुहाए ॥
ब्रह्मानंद सदा लयलीना। देखत बालक बहुकालीना ॥
रूप धरें जनु चारिउ बेदा। समदरसी मुनि बिगत बिभेदा ॥
आसा बसन व्यसन यह तिन्हहीं। रघुपति चरित होइ तहँ सुनहीं ॥
तहाँ रहे सनकादि भवानी। जहँ घटसंभव मुनिबर ग्यानी ॥
राम कथा मुनिबर बहु बरनी। ग्यान जोनि पावक जिमि अरनी ॥
दो. देखि राम मुनि आवत हरषि दंडवत कीन्ह।

स्वागत पूँछि पीत पट प्रभु बैठन कहँ दीन्ह ॥ ३२ ॥

कीन्ह दंडवत तीनिउँ भाई। सहित पवनसुत सुख अधिकाई ॥
मुनि रघुपति छवि अतुल बिलोकी। भए मगन मन सके न रोकी ॥
स्यामल गात सरोरुह लोचन। सुंदरता मंदिर भव मोचन ॥
एकटक रहे निमेष न लावहिं। प्रभु कर जोरें सीस नवावहिं ॥
तिन्ह कै दसा देखि रघुबीरा। स्त्रवत नयन जल पुलक सरीरा ॥
कर गहि प्रभु मुनिबर बैठारे। परम मनोहर बचन उचारे ॥
आजु धन्य मैं सुनहु मुनीसा। तुम्हरेँ दरस जाहिं अघ खीसा ॥
बडे भाग पाइव सतसंगा। बिनहिं प्रयास होहिं भव भंगा ॥

दो. संत संग अपवर्ग कर कामी भव कर पंथ।

कहहि संत कवि कोविद श्रुति पुरान सदग्रंथ ॥ ३३ ॥

सुनि प्रभु बचन हरषि मुनि चारी। पुलकित तन अस्तुति अनुसारी ॥
जय भगवंत अनंत अनामय। अनघ अनेक एक करुनामय ॥
जय निर्गुन जय जय गुन सागर। सुख मंदिर सुंदर अति नागर ॥
जय इंदिरा रमन जय भूधर। अनुपम अज अनादि सोभाकर ॥
ग्यान निधान अमान मानप्रद। पावन सुजस पुरान बेद बद ॥
तग्य कृतग्य अग्यता भंजन। नाम अनेक अनाम निरंजन ॥
सर्व सर्वगत सर्व उरालय। बससि सदा हम कहँ परिपालय ॥
द्वंद बिपति भव फंद बिभंजय। हृदि बसि राम काम मद गंजय ॥

दो. परमानंद कृपायतन मन परिपूरन काम।

प्रेम भगति अनपायनी देहु हमहि श्रीराम ॥ ३४ ॥

देहु भगति रघुपति अति पावनि। त्रिविध ताप भव दाप नसावनि ॥
 प्रनत काम सुरधेनु कलपतरु। होइ प्रसन्न दीजै प्रभु यह बरु ॥
 भव बारिधि कुंभज रघुनायक। सेवत सुलभ सकल सुख दायक ॥
 मन संभव दारुन दुख दारय। दीनबंधु समता विस्तारय ॥
 आस त्रास इरिषादि निवारक। बिनय विवेक विरति विस्तारक ॥
 भूप मौलि मन मंडन धरनी। देहि भगति संसृति सरि तरनी ॥
 मुनि मन मानस हंस निरंतर। चरन कमल बंदित अज संकर ॥
 रघुकुल केतु सेतु श्रुति रच्छक। काल करम सुभाउ गुन भच्छक ॥
 तारन तरन हरन सब दूषन। तुलसिदास प्रभु त्रिभुवन भूषन ॥

दो. बार बार अस्तुति करि प्रेम सहित सिरु नाइ।

ब्रह्म भवन सनकादि गे अति अभीष्ट बर पाइ ॥ ३५ ॥

सनकादिक विधि लोक सिधाए। भ्रातन्ह राम चरन सिरु नाए ॥
 पूछत प्रभुहि सकल सकुचाहीं। चितवहिं सब मारुतसुत पाहीं ॥
 सुनि चहहिं प्रभु मुख कै बानी। जो सुनि होइ सकल भ्रम हानी ॥
 अंतरजामी प्रभु सभ जाना। बूझत कहहु काह हनुमाना ॥
 जोरि पानि कह तब हनुमंता। सुनहु दीनदयाल भगवंता ॥
 नाथ भरत कछु पूँछन चहहीं। प्रसन्न करत मन सकुचत अहहीं ॥
 तुम्ह जानहु कपि मोर सुभाऊ। भरतहि मोहि कछु अंतर काऊ ॥
 सुनि प्रभु बचन भरत गहे चरना। सुनहु नाथ प्रनतारति हरना ॥

दो. नाथ न मोहि संदेह कछु सपनेहुँ सोक न मोह।

केवल कृपा तुम्हारिहि कृपानंद संदोह ॥ ३६ ॥

करउँ कृपानिधि एक टिठाई। मैं सेवक तुम्ह जन सुखदाई ॥
 संतन्ह कै महिमा रघुराई। बहु विधि वेद पुरानन्ह गाई ॥
 श्रीमुख तुम्ह पुनि कीन्हि बडाई। तिन्ह पर प्रभुहि प्रीति अधिकाई ॥
 सुना चहउँ प्रभु तिन्ह कर लच्छन। कृपासिंधु गुन ग्यान बिचच्छन ॥
 संत असंत भेद बिलगाई। प्रनतपाल मोहि कहहु बुझाई ॥
 संतन्ह के लच्छन सुनु भ्राता। अगनित श्रुति पुरान बिख्याता ॥
 संत असंतन्हि कै असि करनी। जिमि कुठार चंदन आचरनी ॥

काटइ परसु मलय सुनु भाई। निज गुन देइ सुगंध बसाई ॥

दो. ताते सुर सीसन्ह चढत जग बल्लभ श्रीखंड।

अनल दाहि पीटत घनहिं परसु बदन यह दंड ॥ ३७ ॥

बिषय अलंपट सील गुनाकर। पर दुख दुख सुख सुख देखे पर ॥
सम अभूतरिपु बिमद बिरागी। लोभामरष हरष भय त्यागी ॥
कोमलचित दीनन्ह पर दाया। मन बच क्रम मम भगति अमाया ॥
सबहि मानप्रद आपु अमानी। भरत प्रान सम मम ते प्रानी ॥
बिगत काम मम नाम परायन। सांति बिरति बिनती मुदितायन ॥
सीतलता सरलता मयत्री। द्विज पद प्रीति धर्म जनयत्री ॥
ए सब लच्छन बसहिं जासु उर। जानेहु तात संत संतत फुर ॥
सम दम नियम नीति नहिं डोलहिं। परुष बचन कबहुँ नहिं बोलहिं ॥

दो. निंदा अस्तुति उभय सम ममता मम पद कंज।

ते सज्जन मम प्रानप्रिय गुन मंदिर सुख पुंज ॥ ३८ ॥

सनहु असंतन्ह केर सुभाऊ। भूलेहुँ संगति करिअ न काऊ ॥
तिन्ह कर संग सदा दुखदाई। जिमि कलपहि घालइ हरहाई ॥
खलन्ह हृदयँ अति ताप बिसेषी। जरहिं सदा पर संपति देखी ॥
जहँ कहुँ निंदा सुनहिं पराई। हरषहिं मनहुँ परी निधि पाई ॥
काम क्रोध मद लोभ परायन। निर्दय कपटी कुटिल मलायन ॥
बयरु अकारन सब काहू सों। जो कर हित अनहित ताहू सों ॥
झूठइ लेना झूठइ देना। झूठइ भोजन झूठ चबेना ॥
बोलहिं मधुर बचन जिमि मोरा। खाइ महा अति हृदय कठोरा ॥

दो. पर द्रोही पर दार रत पर धन पर अपवाद।

ते नर पाँवर पापमय देह धरें मनुजाद ॥ ३९ ॥

लोभइ ओढन लोभइ डसन। सिखोदर पर जमपुर त्रास न ॥
काहू की जौ सुनहिं बडाई। स्वास लेहिं जनु जूडी आई ॥
जब काहू कै देखहिं बिपती। सुखी भए मानहुँ जग नृपती ॥
स्वारथ रत परिवार बिरोधी। लंपट काम लोभ अति क्रोधी ॥
मातु पिता गुर बिप्र न मानहिं। आपु गए अरु घालहिं आनहिं ॥
करहिं मोह बस द्रोह परावा। संत संग हरि कथा न भावा ॥

अवगुन सिंधु मंदमति कामी। वेद विदूषक परधन स्वामी ॥
बिप्र द्रोह पर द्रोह बिसेषा। दंभ कपट जियँ धरें सुबेषा ॥

दो. ऐसे अधम मनुज खल कृतजुग त्रेता नाहिं।

द्रापर कछुक बृंद बहु होइहहिं कलिजुग माहिं ॥ ४० ॥

पर हित सरिस धर्म नहिं भाई। पर पीडा सम नहिं अधमाई ॥
निर्नय सकल पुरान वेद कर। कहेउँ तात जानहिं कोबिद नर ॥
नर सरीर धरि जे पर पीरा। करहिं ते सहहिं महा भव भीरा ॥
करहिं मोह बस नर अघ नाना। स्वारथ रत परलोक नसाना ॥
कालरूप तिन्ह कहँ मै भ्राता। सुभ अरु असुभ कर्म फल दाता ॥
अस विचारि जे परम सयाने। भजहिं मोहि संसृत दुख जाने ॥
त्यागहिं कर्म सुभासुभ दायक। भजहिं मोहि सुर नर मुनि नायक ॥
संत असंतन्ह के गुन भाषे। ते न परहिं भव जिन्ह लिखि राखे ॥

दो. सुनहु तात माया कृत गुन अरु दोष अनेक।

गुन यह उभय न देखिअहिं देखिअ सो अबिवेक ॥ ४१ ॥

श्रीमुख बचन सुनत सब भाई। हरषे प्रेम न हृदयँ समाई ॥
करहिं बिनय अति बारहिं बारा। हनूमान हियँ हरष अपारा ॥
पुनि रघुपति निज मंदिर गए। एहि विधि चरित करत नित नए ॥
बार बार नारद मुनि आवहिं। चरित पुनीत राम के गावहिं ॥
नित नव चरन देखि मुनि जाहीं। ब्रह्मलोक सब कथा कहाहीं ॥
सुनि विरंचि अतिसय सुख मानहिं। पुनि पुनि तात करहु गुन गानहिं ॥
सनकादिक नारदहि सराहहिं। जद्यपि ब्रह्म निरत मुनि आहहिं ॥
सुनि गुन गान समाधि बिसारी ॥ सादर सुनहिं परम अधिकारी ॥

दो. जीवनमुक्त ब्रह्मपर चरित सुनहिं तजि ध्यान।

जे हरि कथाँ न करहिं रति तिन्ह के हिय पाषान ॥ ४२ ॥

एक बार रघुनाथ बोलाए। गुर द्विज पुरवासी सब आए ॥
बैठे गुर मुनि अरु द्विज सज्जन। बोले बचन भगत भव भंजन ॥
सनहु सकल पुरजन मम बानी। कहउँ न कछु ममता उर आनी ॥
नहिं अनीति नहिं कछु प्रभुताई। सुनहु करहु जो तुम्हहि सोहाई ॥
सोइ सेवक प्रियतम मम सोई। मम अनुसासन मानै जोई ॥

जौं अनीति कछु भाषौं भाई। तौं मोहि बरजहु भय बिसराई ॥
बड़ें भाग मानुष तनु पावा। सुर दुर्लभ सब ग्रंथिन्ह गावा ॥
साधन धाम मोच्छ कर द्वारा। पाइ न जेहि परलोक सँवारा ॥

दो. सो परत्र दुख पावइ सिर धुनि धुनि पछिताइ।
कालहि कर्महि ईस्वरहि मिथ्या दोष लगाइ ॥ ४३ ॥

एहि तन कर फल विषय न भाई। स्वर्गउ स्वल्प अंत दुखदाई ॥
नर तनु पाइ विषयँ मन देहीं। पलटि सुधा ते सठ बिष लेहीं ॥
ताहि कबहुँ भल कहइ न कोई। गुंजा ग्रहइ परस मनि खोई ॥
आकर चारि लच्छ चौरासी। जोनि भ्रमत यह जिव अविनासी ॥
फिरत सदा माया कर प्रेरा। काल कर्म सुभाव गुन घेरा ॥
कबहुँक करि करुना नर देहीं। देत ईस बिनु हेतु सनेही ॥
नर तनु भव बारिधि कहुँ बेरो। सन्मुख मरुत अनुग्रह मेरो ॥
करनधार सदगुर दृढ नावा। दुर्लभ साज सुलभ करि पावा ॥

दो. जो न तरै भव सागर नर समाज अस पाइ।
सो कृत निंदक मंदमति आत्माहन गति जाइ ॥ ४४ ॥

जौं परलोक इहाँ सुख चहहू। सुनि मम बचन हृदयँ दृढ गहहू ॥
सुलभ सुखद मारग यह भाई। भगति मोरि पुरान श्रुति गाई ॥
ग्यान अगम प्रत्यूह अनेका। साधन कठिन न मन कहुँ टेका ॥
करत कष्ट बहु पावइ कोऊ। भक्ति हीन मोहि प्रिय नहिँ सोऊ ॥
भक्ति सुतंत्र सकल सुख खानी। बिनु सतसंग न पावहिँ प्रानी ॥
पुन्य पुंज बिनु मिलहिँ न संता। सतसंगति संसृति कर अंता ॥
पुन्य एक जग महुँ नहिँ दूजा। मन क्रम बचन विप्र पद पूजा ॥
सानुकूल तेहि पर मुनि देवा। जो तजि कपटु करइ द्विज सेवा ॥

दो. औरउ एक गुपुत मत सबहि कहउँ कर जोरि।
संकर भजन बिना नर भगति न पावइ मोरि ॥ ४५ ॥

कहहु भगति पथ कवन प्रयासा। जोग न मख जप तप उपवासा ॥
सरल सुभाव न मन कुटिलाई। जथा लाभ संतोष सदाई ॥
मोर दास कहाइ नर आसा। करइ तौ कहहु कहा बिस्वासा ॥
बहुत कहउँ का कथा बढ़ाई। एहि आचरन बस्य मै भाई ॥

बैर न बिग्रह आस न त्रासा। सुखमय ताहि सदा सब आसा ॥
 अनारंभ अनिकेत अमानी। अनघ अरोष दच्छ बिग्यानी ॥
 प्रीति सदा सज्जन संसर्गा। तून सम बिषय स्वर्ग अपवर्गा ॥
 भगति पच्छ हठ नहिं सठताई। दुष्ट तर्क सब दूरि बहाई ॥

दो. मम गुन ग्राम नाम रत गत ममता मद मोह।

ता कर सुख सोइ जानइ परानंद संदोह ॥ ४६ ॥

सुनत सुधासम बचन राम के। गहे सबनि पद कृपाधाम के ॥
 जननि जनक गुर बंधु हमारे। कृपा निधान प्रान ते प्यारे ॥
 तनु धनु धाम राम हितकारी। सब विधि तुम्ह प्रनतारति हारी ॥
 असि सिख तुम्ह बिनु देइ न कोऊ। मातु पिता स्वारथ रत ओऊ ॥
 हेतु रहित जग जुग उपकारी। तुम्ह तुम्हार सेवक असुरारी ॥
 स्वारथ मीत सकल जग माहीं। सपनेहुँ प्रभु परमारथ नाहीं ॥
 सबके बचन प्रेम रस साने। सुनि रघुनाथ हृदयँ हरषाने ॥
 निज निज गृह गए आयसु पाई। बरनत प्रभु बतकही सुहाई ॥

दो. -उमा अवधवासी नर नारि कृतारथ रूप।

ब्रह्म सच्चिदानंद घन रघुनायक जहँ भूप ॥ ४७ ॥

एक बार बसिष्ट मुनि आए। जहाँ राम सुखधाम सुहाए ॥
 अति आदर रघुनायक कीन्हा। पद पखारि पादोदक लीन्हा ॥
 राम सुनहु मुनि कह कर जोरी। कृपासिंधु बिनती कछु मोरी ॥
 देखि देखि आचरन तुम्हारा। होत मोह मम हृदयँ अपारा ॥
 महिमा अमित बेद नहिं जाना। मैं केहि भाँति कहउँ भगवाना ॥
 उपरोहित्य कर्म अति मंदा। बेद पुरान सुमृति कर निंदा ॥
 जब न लेउँ मैं तब विधि मोही। कहा लाभ आगें सुत तोही ॥
 परमातमा ब्रह्म नर रूपा। होइहि रघुकुल भूषन भूपा ॥

दो. -तब मैं हृदयँ बिचारा जोग जग्य ब्रत दान।

जा कहुँ करिअ सो पैहउँ धर्म न एहि सम आन ॥ ४८ ॥

जप तप नियम जोग निज धर्मा। श्रुति संभव नाना सुभ कर्मा ॥
 ग्यान दया दम तीरथ मज्जन। जहँ लागि धर्म कहत श्रुति सज्जन ॥
 आगम निगम पुरान अनेका। पढे सुने कर फल प्रभु एका ॥

तब पद पंकज प्रीति निरंतर। सब साधन कर यह फल सुंदर ॥
छूटइ मल कि मलहि के धोएँ। घृत कि पाव कोइ बारी बिलोएँ ॥
प्रेम भगति जल बिनु रघुराई। अभिअंतर मल कबहुँ न जाई ॥
सोइ सर्वग्य तग्य सोइ पंडित। सोइ गुन गृह विग्यान अखंडित ॥
दच्छ सकल लच्छन जुत सोई। जाके पद सरोज रति होई ॥

दो. नाथ एक वर मागउँ राम कृपा करि देहु।

जन्म जन्म प्रभु पद कमल कबहुँ घटै जनि नेहु ॥ ४९ ॥

अस कहि मुनि बसिष्ट गृह आए। कृपासिंधु के मन अति भाए ॥
हनूमान भरतादिक भ्राता। संग लिए सेवक सुखदाता ॥
पुनि कृपाल पुर बाहेर गए। गज रथ तुरग मगावत भए ॥
देखि कृपा करि सकल सराहे। दिए उचित जिन्ह जिन्ह तेइ चाहे ॥
हरन सकल श्रम प्रभु श्रम पाई। गए जहाँ सीतल अवर्राई ॥
भरत दीन्ह निज बसन डसाई। बैठे प्रभु सेवहिं सब भाई ॥
मारुतसुत तब मारुत करई। पुलक बपुष लोचन जल भरई ॥
हनूमान सम नहिं बडभागी। नहिं कोउ राम चरन अनुरागी ॥
गिरिजा जासु प्रीति सेवकाई। बार बार प्रभु निज मुख गाई ॥

दो. तेहिं अवसर मुनि नारद आए करतल बीन।

गावन लगे राम कल कीरति सदा नवीन ॥ ५० ॥

मामवलोकय पंकज लोचन। कृपा बिलोकनि सोच विमोचन ॥
नील तामरस स्याम काम अरि। हृदय कंज मकरंद मधुप हरि ॥
जातुधान बरूथ बल भंजन। मुनि सज्जन रंजन अघ गंजन ॥
भूसुर ससि नव वृंद बलाहक। असरन सरन दीन जन गाहक ॥
भुज बल विपुल भार महि खंडित। खर दूषन विराध बध पंडित ॥
रावनारि सुखरूप भूपवर। जय दसरथ कुल कुमुद सुधाकर ॥
सुजस पुरान बिदित निगमागम। गावत सुर मुनि संत समागम ॥
कारुनीक व्यलीक मद खंडन। सब विधि कुसल कोसला मंडन ॥
कलि मल मथन नाम ममताहन। तुलसीदास प्रभु पाहि प्रनत जन ॥

दो. प्रेम सहित मुनि नारद बरनि राम गुन ग्राम।

सोभासिंधु हृदयँ धरि गए जहाँ विधि धाम ॥ ५१ ॥

गिरिजा सुनहु बिसद यह कथा। मैं सब कही मोरि मति जथा ॥
 राम चरित सत कोटि अपारा। श्रुति सारदा न बरनै पारा ॥
 राम अनंत अनंत गुनानी। जन्म कर्म अनंत नामानी ॥
 जल सीकर महि रज गनि जाहीं। रघुपति चरित न बरनि सिराहीं ॥
 बिमल कथा हरि पद दायनी। भगति होइ सुनि अनपायनी ॥
 उमा कहिउँ सब कथा सुहाई। जो भुसुंङि खगपतिहि सुनाई ॥
 कल्युक्त राम गुन कहेउँ बखानी। अब का कहौं सो कहहु भवानी ॥
 सुनि सुभ कथा उमा हरषानी। बोली अति बिनीत मृदु बानी ॥
 धन्य धन्य मैं धन्य पुरारी। सुनेउँ राम गुन भव भय हारी ॥

दो. तुम्हरी कृपाँ कृपायतन अब कृतकृत्य न मोह।
 जानेउँ राम प्रताप प्रभु चिदानंद संदोह ॥ ५२(क) ॥

नाथ तवानन ससि स्रवत कथा सुधा रघुबीर।
 श्रवन पुटन्हि मन पान करि नहिं अघात मतिधीर ॥ ५२(ख) ॥

राम चरित जे सुनत अघाहीं। रस बिसेष जाना तिन्ह नाहीं ॥
 जीवनमुक्त महामुनि जेऊ। हरि गुन सुनहीं निरंतर तेऊ ॥
 भव सागर चह पार जो पावा। राम कथा ता कहँ दृढ नावा ॥
 बिषइन्ह कहँ पुनि हरि गुन ग्रामा। श्रवन सुखद अरु मन अभिरामा ॥
 श्रवनवंत अस को जग माहीं। जाहि न रघुपति चरित सोहाहीं ॥
 ते जड जीव निजात्मक घाती। जिन्हहि न रघुपति कथा सोहाती ॥
 हरिचरित्र मानस तुम्ह गावा। सुनि मैं नाथ अमिति सुख पावा ॥
 तुम्ह जो कही यह कथा सुहाई। कागभसुंङि गरुड प्रति गाई ॥

दो. बिरति ग्यान बिग्यान दृढ राम चरन अति नेह।
 बायस तन रघुपति भगति मोहि परम संदेह ॥ ५३ ॥

नर सहस्र महँ सुनहु पुरारी। कोउ एक होइ धर्म व्रतधारी ॥
 धर्मसील कोटिक महँ कोई। बिषय बिमुख बिराग रत होई ॥
 कोटि बिरक्त मध्य श्रुति कहई। सम्यक ग्यान सकृत कोउ लहई ॥
 ग्यानवंत कोटिक महँ कोऊ। जीवनमुक्त सकृत जग सोऊ ॥
 तिन्ह सहस्र महँ सब सुख खानी। दुर्लभ ब्रह्मलीन बिग्यानी ॥
 धर्मसील बिरक्त अरु ग्यानी। जीवनमुक्त ब्रह्मपर प्रानी ॥

सब ते सो दुर्लभ सुरराया। राम भगति रत गत मद माया ॥
सो हरिभगति काग किमि पाई। बिस्वनाथ मोहि कहहु बुझाई ॥

दो. राम परायन ग्यान रत गुनागार मति धीर।
नाथ कहहु केहि कारन पायउ काक सरीर ॥ ५४ ॥

यह प्रभु चरित पवित्र सुहावा। कहहु कृपाल काग कहँ पावा ॥
तुम्ह केहि भाँति सुना मदनारी। कहहु मोहि अति कौतुक भारी ॥
गरुड महाग्यानी गुन रासी। हरि सेवक अति निकट निवासी ॥
तेहिं केहि हेतु काग सन जाई। सुनी कथा मुनि निकर बिहाई ॥
कहहु कवन विधि भा संवादा। दोउ हरिभगत काग उरगादा ॥
गौरि गिरा सुनि सरल सुहाई। बोले सिव सादर सुख पाई ॥
धन्य सती पावन मति तोरी। रघुपति चरन प्रीति नहिं थोरी ॥
सुनहु परम पुनीत इतिहासा। जो सुनि सकल लोक भ्रम नासा ॥
उपजइ राम चरन बिस्वासा। भव निधि तर नर विनहिं प्रयासा ॥

दो. ऐसिअ प्रसन्न बिहंगपति कीन्ह काग सन जाइ।
सो सब सादर कहिहउँ सुनहु उमा मन लाइ ॥ ५५ ॥

मैं जिमि कथा सुनी भव मोचनि। सो प्रसंग सुनु सुमुखि सुलोचनि ॥
प्रथम दच्छ गृह तव अवतारा। सती नाम तव रहा तुम्हारा ॥
दच्छ जग्य तव भा अपमाना। तुम्ह अति क्रोध तजे तव प्राना ॥
मम अनुचरन्ह कीन्ह मख भंगा। जानहु तुम्ह सो सकल प्रसंगा ॥
तव अति सोच भयउ मन मोरें। दुखी भयउँ बियोग प्रिय तोरें ॥
सुंदर बन गिरि सरित तडागा। कौतुक देखत फिरउँ बेरागा ॥
गिरि सुमेर उत्तर दिसि दूरी। नील सैल एक सुन्दर भूरी ॥
तासु कनकमय सिखर सुहाए। चारि चारु मोरे मन भाए ॥
तिन्ह पर एक एक बिटप बिसाला। बट पीपर पाकरी रसाला ॥
सैलोपरि सर सुंदर सोहा। मनि सोपान देखि मन मोहा ॥

दो. -सीतल अमल मधुर जल जलज विपुल बहुरंग।
कूजत कल रव हंस गन गुंजत मजुंल भृंग ॥ ५६ ॥

तेहिं गिरि रुचिर बसइ खग सोई। तासु नास कल्पांत न होई ॥
माया कृत गुन दोष अनेका। मोह मनोज आदि अबिवेका ॥

रहे व्यापि समस्त जग माहीं। तेहि गिरि निकट कबहुँ नहिं जाहीं ॥
 तहँ बसि हरिहि भजइ जिमि कागा। सो सुनु उमा सहित अनुरागा ॥
 पीपर तरु तर ध्यान सो धरई। जाप जग्य पाकरि तर करई ॥
 आँब छाहँ कर मानस पूजा। तजि हरि भजनु काजु नहिं दूजा ॥
 बर तर कह हरि कथा प्रसंगा। आवहिं सुनहिं अनेक विहंगा ॥
 राम चरित बिचीत्र विधि नाना। प्रेम सहित कर सादर गाना ॥
 सुनहिं सकल मति विमल मराला। बसहिं निरंतर जे तेहिं ताला ॥
 जब मैं जाइ सो कौतुक देखा। उर उपजा आनंद विसेषा ॥

दो. तब कछु काल मराल तनु धरि तहँ कीन्ह निवास।

सादर सुनि रघुपति गुन पुनि आयउँ कैलास ॥ ५७ ॥

गिरिजा कहेउँ सो सब इतिहासा। मैं जेहि समय गयउँ खग पासा ॥
 अब सो कथा सुनहु जेही हेतू। गयउ काग पहिं खग कुल केतू ॥
 जब रघुनाथ कीन्हि रन क्रीडा। समुझत चरित होति मोहि ब्रीडा ॥
 इंद्रजीत कर आपु बँधायो। तब नारद मुनि गरुड पठायो ॥
 बंधन काटि गयो उरगादा। उपजा हृदयँ प्रचंड विषादा ॥
 प्रभु बंधन समुझत बहु भाँती। करत बिचार उरग आराती ॥
 व्यापक ब्रह्म बिरज बागीसा। माया मोह पार परमीसा ॥
 सो अवतार सुनेउँ जग माहीं। देखेउँ सो प्रभाव कछु नाहीं ॥

दो. -भव बंधन ते छूटहिं नर जपि जा कर नाम।

खर्च निसाचर बाँधेउ नागपास सोइ राम ॥ ५८ ॥

नाना भाँति मनहि समुझावा। प्रगट न ग्यान हृदयँ भ्रम छावा ॥
 खेद खिन्न मन तर्क बढ़ाई। भयउ मोहबस तुम्हरिहिं नाई ॥
 व्याकुल गयउ देवरिषि पाहीं। कहेसि जो संसय निज मन माहीं ॥
 सुनि नारदहि लागि अति दाय। सुनु खग प्रबल राम कै माया ॥
 जो ग्यानिन्ह कर चित अपहरई। बरिआई बिमोह मन करई ॥
 जेहि बहु बार नचावा मोही। सोइ व्यापी बिहंगपति तोही ॥
 महामोह उपजा उर तोरें। मिटिहि न बेगि कहें खग मोरें ॥
 चतुरानन पहिं जाहु खगेसा। सोइ करेहु जेहि होइ निदेसा ॥

दो. अस कहि चले देवरिषि करत राम गुन गान।

हरि माया बल बरनत पुनि पुनि परम सुजान ॥ ५९ ॥

तब खगपति बिरंचि पहिं गयऊ। निज संदेह सुनावत भयऊ ॥
सुनि बिरंचि रामहि सिरु नावा। समुझि प्रताप प्रेम अति छावा ॥
मन महुँ करइ बिचार बिधाता। माया बस कवि कोबिद ग्याता ॥
हरि माया कर अमिति प्रभावा। बिपुल बार जेहिं मोहि नचावा ॥
अग जगमय जग मम उपराजा। नहिं आचरज मोह खगराजा ॥
तब बोले बिधि गिरा सुहाई। जान महेस राम प्रभुताई ॥
बैनतेय संकर पहिं जाहू। तात अनत पूछहु जनि काहू ॥
तहँ होइहि तव संसय हानी। चलेउ बिहंग सुनत बिधि बानी ॥

दो. परमातुर बिहंगपति आयउ तब मो पास।

जात रहेउँ कुबेर गृह रहिहु उमा कैलास ॥ ६० ॥

तेहिं मम पद सादर सिरु नावा। पुनि आपन संदेह सुनावा ॥
सुनि ता करि बिनती मृदु बानी। परेम सहित मैं कहेउँ भवानी ॥
मिलेहु गरुड मारग महुँ मोही। कवन भाँति समुझावौ तोही ॥
तबहि होइ सब संसय भंगा। जब बहु काल करिअ सतसंगा ॥
सुनिअ तहाँ हरि कथा सुहाई। नाना भाँति मुनिन्ह जो गाई ॥
जेहि महुँ आदि मध्य अवसाना। प्रभु प्रतिपाद्य राम भगवाना ॥
नित हरि कथा होत जहँ भाई। पठवउँ तहाँ सुनाहि तुम्ह जाई ॥
जाइहि सुनत सकल संदेहा। राम चरन होइहि अति नेहा ॥

दो. विनु सतसंग न हरि कथा तेहि विनु मोह न भाग।

मोह गएँ विनु राम पद होइ न दृढ अनुराग ॥ ६१ ॥

मिलिहि न रघुपति विनु अनुरागा। किएँ जोग तप ग्यान बिरागा ॥
उत्तर दिसि सुंदर गिरि नीला। तहँ रह काकभुसुंडि सुसीला ॥
राम भगति पथ परम प्रवीना। ग्यानी गुन गृह बहु कालीना ॥
राम कथा सो कहइ निरंतर। सादर सुनहिं बिबिध बिहंगबर ॥
जाइ सुनहु तहँ हरि गुन भूरी। होइहि मोह जनित दुख दूरी ॥
मैं जब तेहि सब कहा बुझाई। चलेउ हरषि मम पद सिरु नाई ॥
ताते उमा न मैं समुझावा। रघुपति कृपाँ मरमु मैं पावा ॥
होइहि कीन्ह कबहुँ अभिमाना। सो खौवै चह कृपानिधाना ॥

कल्लु तेहि ते पुनि मैं नहिं राखा। समुझइ खग खगही कै भाषा ॥
प्रभु माया बलवंत भवानी। जाहि न मोह कवन अस ग्यानी ॥

दो. ग्यानि भगत सिरोमनि त्रिभुवनपति कर जान।

ताहि मोह माया नर पावँर करहिं गुमान ॥ ६२(क) ॥

मासपारायण, अट्टाईसवाँ विश्राम

सिव विरंचि कहूँ मोहइ को है बपुरा आन।

अस जियँ जानि भजहिं मुनि माया पति भगवान ॥ ६२(ख) ॥

गयउ गरुड जहँ बसइ भुसुंडा। मति अकुंठ हरि भगति अखंडा ॥

देखि सैल प्रसन्न मन भयऊ। माया मोह सोच सब गयऊ ॥

करि तडाग मज्जन जलपाना। बट तर गयउ हृदयँ हरषाना ॥

बृद्ध बृद्ध बिहंग तहँ आए। सुनै राम के चरित सुहाए ॥

कथा अरंभ करै सोइ चाहा। तेही समय गयउ खगनाहा ॥

आवत देखि सकल खगराजा। हरषेउ बायस सहित समाजा ॥

अति आदर खगपति कर कीन्हा। स्वागत पूछि सुआसन दीन्हा ॥

करि पूजा समेत अनुरागा। मधुर बचन तब बोलेउ कागा ॥

दो. नाथ कृतारथ भयउँ मैं तव दरसन खगराज।

आयसु देहु सो करौं अब प्रभु आयहु केहि काज ॥ ६३(क) ॥

सदा कृतारथ रूप तुम्ह कह मृदु बचन खगेस।

जेहि कै अस्तुति सादर निज मुख कीन्हि महेस ॥ ६३(ख) ॥

सुनहु तात जेहि कारन आयउँ। सो सब भयउ दरस तव पायउँ ॥

देखि परम पावन तव आश्रम। गयउ मोह संसय नाना भ्रम ॥

अब श्रीराम कथा अति पावनि। सदा सुखद दुख पुंज नसावनि ॥

सादर तात सुनावहु मोही। बार बार बिनवउँ प्रभु तोही ॥

सुनत गरुड कै गिरा बिनीता। सरल सुप्रेम सुखद सुपुनीता ॥

भयउ तासु मन परम उछाहा। लाग कहै रघुपति गुन गाहा ॥

प्रथमहिं अति अनुराग भवानी। रामचरित सर कहेसि बखानी ॥

पुनि नारद कर मोह अपारा। कहेसि बहुरि रावन अवतारा ॥

प्रभु अवतार कथा पुनि गाई। तब सिसु चरित कहेसि मन लाई ॥

दो. बालचरित कहिं विविध विधि मन महाँ परम उछाह।

रिषि आगवन कहेसि पुनि श्री रघुवीर विबाह ॥ ६४ ॥

बहुरि राम अभिषेक प्रसंगा। पुनि नृप बचन राज रस भंगा ॥
पुरबासिन्ह कर विरह विषादा। कहेसि राम लछिमन संवादा ॥
विपिन गवन केवट अनुरागा। सुरसरि उतरि निवास प्रयागा ॥
बालमीक प्रभु मिलन बखाना। चित्रकूट जिमि बसे भगवाना ॥
सचिवागवन नगर नृप मरना। भरतागवन प्रेम बहु बरना ॥
करि नृप क्रिया संग पुरबासी। भरत गए जहँ प्रभु सुख रासी ॥
पुनि रघुपति बहु बिधि समुझाए। लै पादुका अवधपुर आए ॥
भरत रहनि सुरपति सुत करनी। प्रभु अरु अत्रि भेंट पुनि बरनी ॥

दो. कहि विराध बध जेहि बिधि देह तजी सरभंग ॥

बरनि सुतीछन प्रीति पुनि प्रभु अगस्ति सतसंग ॥ ६५ ॥

कहि दंडक बन पावनताई। गीध मइत्री पुनि तेहिं गाई ॥
पुनि प्रभु पंचवटीं कृत बासा। भंजी सकल मुनिन्ह की त्रासा ॥
पुनि लछिमन उपदेस अनूपा। सूपनखा जिमि कीन्हि कुरूपा ॥
खर दूषन बध बहुरि बखाना। जिमि सब मरमु दसानन जाना ॥
दसकंधर मारीच बतकहीं। जेहि बिधि भई सो सब तेहिं कही ॥
पुनि माया सीता कर हरना। श्रीरघुवीर विरह कछु बरना ॥
पुनि प्रभु गीध क्रिया जिमि कीन्ही। बधि कबंध सबरिहि गति दीन्ही ॥
बहुरि विरह बरनत रघुवीरा। जेहि बिधि गए सरोबर तीरा ॥

दो. प्रभु नारद संवाद कहि मारुति मिलन प्रसंग।

पुनि सुग्रीव मितार्ई बालि प्रान कर भंग ॥ ६६(क) ॥

कपिहि तिलक करि प्रभु कृत सैल प्रवरषन बास।

बरनन बर्षा सरद अरु राम रोष कपि त्रास ॥ ६६(ख) ॥

जेहि बिधि कपिपति कीस पठाए। सीता खोज सकल दिसि धाए ॥
बिबर प्रवेस कीन्ह जेहि भाँती। कपिन्ह बहोरि मिला संपाती ॥
सुनि सब कथा समीरकुमारा। नाघत भयउ पयोधि अपारा ॥
लंकाँ कपि प्रवेस जिमि कीन्हा। पुनि सीतहि धीरजु जिमि दीन्हा ॥
बन उजारि रावनहि प्रबोधी। पुर दहि नाघेउ बहुरि पयोधी ॥
आए कपि सब जहँ रघुराई। वैदेही कि कुसल सुनाई ॥

सेन समेति जथा रघुवीरा। उतरे जाइ बारिनिधि तीरा ॥
मिला विभीषण जेहि विधि आई। सागर निग्रह कथा सुनाई ॥

दो. सेतु बाँधि कपि सेन जिमि उतरी सागर पार।
गयउ बसीठी वीरबर जेहि विधि बालिकुमार ॥ ६७(क) ॥
निसिचर कीस लराई बरनिसि विविध प्रकार।
कुंभकरन घननाद कर बल पौरुष संघार ॥ ६७(ख) ॥

निसिचर निकर मरन विधि नाना। रघुपति रावन समर बखाना ॥
रावन बध मंदोदरि सोका। राज विभीषण देव असोका ॥
सीता रघुपति मिलन बहोरी। सुरन्ह कीन्ह अस्तुति कर जोरी ॥
पुनि पुष्पक चढि कपिन्ह समेता। अवध चले प्रभु कृपा निकेता ॥
जेहि विधि राम नगर निज आए। बायस बिसद चरित सब गाए ॥
कहेसि बहोरि राम अभिषैका। पुर बरनत नृपनीति अनेका ॥
कथा समस्त भुसुंड बखानी। जो मैं तुम्ह सन कही भवानी ॥
सुनि सब राम कथा खगनाहा। कहत बचन मन परम उछाहा ॥

सो. गयउ मोर संदेह सुनेउँ सकल रघुपति चरित।
भयउ राम पद नेह तव प्रसाद बायस तिलक ॥ ६८(क) ॥
मोहि भयउ अति मोह प्रभु बंधन रन हूँ निरखि।
चिदानंद संदोह राम बिकल कारन कवन। ६८(ख) ॥

देखि चरित अति नर अनुसारी। भयउ हृदयँ मम संसय भारी ॥
सोइ भ्रम अब हित करि मैं माना। कीन्ह अनुग्रह कृपानिधाना ॥
जो अति आतप व्याकुल होई। तरु छाया सुख जानइ सोई ॥
जौ नहिं होत मोह अति मोही। मिलतेउँ तात कवन विधि तोही ॥
सुनतेउँ किमि हरि कथा सुहाई। अति बिचित्र बहु विधि तुम्ह गाई ॥
निगमागम पुरान मत एहा। कहहिं सिद्ध मुनि नहिं संदेहा ॥
संत बिसुद्ध मिलहिं परि तेही। चितवहिं राम कृपा करि जेही ॥
राम कृपाँ तव दरसन भयऊ। तव प्रसाद सब संसय गयऊ ॥

दो. सुनि बिहंगपति बानी सहित बिनय अनुराग।
पुलक गात लोचन सजल मन हरषेउ अति काग ॥ ६९(क) ॥

श्रोता सुमति सुसील सुचि कथा रसिक हरि दास।

पाइ उमा अति गोप्यमपि सज्जन करहिं प्रकास ॥ ६९(ख) ॥

बोलेउ काकभसुंड बहोरी। नभग नाथ पर प्रीति न थोरी ॥
सब बिधि नाथ पूज्य तुम्ह मेरे। कृपापात्र रघुनायक केरे ॥
तुम्हहि न संसय मोह न माया। मो पर नाथ कीन्ह तुम्ह दाया ॥
पठइ मोह मिस खगपति तोही। रघुपति दीन्हि बडाई मोही ॥
तुम्ह निज मोह कही खग साई। सो नहिं कछु आचरज गोसाई ॥
नारद भव बिरंचि सनकादी। जे मुनिनायक आतमबादी ॥
मोह न अंध कीन्ह केहि केही। को जग काम नचाव न जेही ॥
तुम्हाँ केहि न कीन्ह बौराहा। केहि कर हृदय क्रोध नहिं दाहा ॥

दो. ग्यानी तापस सूर कवि कोविद गुन आगार।

केहि कै लौभ बिडंबना कीन्हि न एहिं संसार ॥ ७०(क) ॥

श्री मद बक्र न कीन्ह केहि प्रभुता बधिर न काहि।

मृगलोचनि के नैन सर को अस लाग न जाहि ॥ ७०(ख) ॥

गुन कृत सन्यपात नहिं केही। कोउ न मान मद तजेउ निबेही ॥
जोबन ज्वर केहि नहिं बलकावा। ममता केहि कर जस न नसावा ॥
मच्छर काहि कलंक न लावा। काहि न सोक समीर डोलावा ॥
चिंता साँपिनि को नहिं खाया। को जग जाहि न व्यापी माया ॥
कीट मनोरथ दारु सरीरा। जेहि न लाग घुन को अस धीरा ॥
सुत बित लोक ईषना तीनी। केहि के मति इन्ह कृत न मलीनी ॥
यह सब माया कर परिवारा। प्रबल अभिति को बरनै पारा ॥
सिव चतुरानन जाहि डेराहीं। अपर जीव केहि लेखे माहीं ॥

दो. व्यापि रहेउ संसार महुँ माया कटक प्रचंड ॥

सेनापति कामादि भट दंभ कपट पाषंड ॥ ७१(क) ॥

सो दासी रघुवीर कै समुझें मिथ्या सोपि।

छूट न राम कृपा विनु नाथ कहउँ पद रोपि ॥ ७१(ख) ॥

जो माया सब जगहि नचावा। जासु चरित लखि काहुँ न पावा ॥
सोइ प्रभु भू बिलास खगराजा। नाच नटी इव सहित समाजा ॥
सोइ सच्चिदानंद घन रामा। अज विग्यान रूपो बल धामा ॥

व्यापक व्याप्य अखंड अनन्ता। अखिल अमोघसक्ति भगवंता ॥
अगुन अदभ्र गिरा गोतीता। सबदरसी अनवद्य अजीता ॥
निर्मम निराकार निरमोहा। नित्य निरंजन सुख संदोहा ॥
प्रकृति पार प्रभु सब उर बासी। ब्रह्म निरीह विरज अविनासी ॥
इहाँ मोह कर कारन नाहीं। रबि सन्मुख तम कबहुँ कि जाहीं ॥

दो. भगत हेतु भगवान प्रभु राम धरेउ तनु भूप।

किए चरित पावन परम प्राकृत नर अनुरूप ॥ ७२(क) ॥

जथा अनेक बेष धरि नृत्य करइ नट कोइ।

सोइ सोइ भाव देखावइ आपुन होइ न सोइ ॥ ७२(ख) ॥

असि रघुपति लीला उरगारी। दनुज बिमोहनि जन सुखकारी ॥
जे मति मलिन बिषयबस कामी। प्रभु मोह धरहिँ इमि स्वामी ॥
नयन दोष जा कहँ जब होई। पीत बरन ससि कहँ कह सोई ॥
जब जेहि दिसि भ्रम होइ खगेसा। सो कह पच्छिम उयउ दिनेसा ॥
नौकारूढ चलत जग देखा। अचल मोह बस आपुहि लेखा ॥
बालक भ्रमहिँ न भ्रमहिँ गृहादीं। कहहिँ परस्पर मिथ्याबादी ॥
हरि बिषइक अस मोह बिहंगा। सपनेहुँ नहिँ अग्यान प्रसंगा ॥
मायाबस मतिमंद अभागी। हृदयँ जमनिका बहुबिधि लागी ॥
ते सठ हठ बस संसय करहीं। निज अग्यान राम पर धरहीं ॥

दो. काम क्रोध मद लोभ रत गृहासक्त दुखरूप।

ते किमि जानहिँ रघुपतिहि मूढ परे तम कूप ॥ ७३(क) ॥

निर्गुन रूप सुलभ अति सगुन जान नहिँ कोइ।

सुगम अगम नाना चरित सुनि मुनि मन भ्रम होइ ॥ ७३(ख) ॥

सुनु खगेस रघुपति प्रभुताई। कहउँ जथामति कथा सुहाई ॥
जेहि बिधि मोह भयउ प्रभु मोही। सोउ सब कथा सुनावउँ तोही ॥
राम कृपा भाजन तुम्ह ताता। हरि गुन प्रीति मोहि सुखदाता ॥
ताते नहिँ कछु तुम्हहिँ दुरावउँ। परम रहस्य मनोहर गावउँ ॥
सुनहु राम कर सहज सुभाऊ। जन अभिमान न राखहिँ काऊ ॥
संसृत मूल सूलप्रद नाना। सकल सोक दायक अभिमाना ॥
ताते करहिँ कृपानिधि दूरी। सेवक पर ममता अति भूरी ॥

जिमि सिसु तन ब्रन होइ गोसाई। मातु चिराव कठिन की नाई ॥

दो. जदपि प्रथम दुख पावइ रोवइ बाल अधीर।

व्याधि नास हित जननी गनति न सो सिसु पीर ॥ ७४(क) ॥

तिमि रघुपति निज दासकर हरहिं मान हित लागि।

तुलसिदास ऐसे प्रभुहि कस न भजहु भ्रम त्यागि ॥ ७४(ख) ॥

राम कृपा आपनि जडताई। कहउँ खगोस सुनहु मन लाई ॥

जब जब राम मनुज तनु धरहीं। भक्त हेतु लील बहु करहीं ॥

तब तब अवधपुरी मैं जाऊँ। बालचरित बिलोकि हरषाऊँ ॥

जन्म महोत्सव देखउँ जाई। बरष पाँच तहँ रहउँ लोभाई ॥

इष्टदेव मम बालक रामा। सोभा बपुष कोटि सत कामा ॥

निज प्रभु बदन निहारि निहारी। लोचन सुफल करउँ उरगारी ॥

लघु बायस बपु धरि हरि संग्गा। देखउँ बालचरित बहुरंग्गा ॥

दो. लरिकाई जहँ जहँ फिरहिं तहँ तहँ संग उडाउँ।

जूठनि परइ अजिर महँ सो उठाइ करि खाउँ ॥ ७५(क) ॥

एक बार अतिसय सब चरित किए रघुवीर।

सुमिरत प्रभु लीला सोइ पुलकित भयउ सरीर ॥ ७५(ख) ॥

कहइ भसुंड सुनहु खगनायक। रामचरित सेवक सुखदायक ॥

नृपमंदिर सुंदर सब भाँती। खचित कनक मनि नाना जाती ॥

बरनि न जाइ रुचिर अँगनाई। जहँ खेलहिं नित चारिउ भाई ॥

बालबिनोद करत रघुराई। बिचरत अजिर जननि सुखदाई ॥

मरकत मृदुल कलेवर स्यामा। अंग अंग प्रति छबि बहु कामा ॥

नव राजीव अरुन मृदु चरना। पदज रुचिर नख ससि दुति हरना ॥

ललित अंक कुलिसादिक चारी। नूपुर चारू मधुर रवकारी ॥

चारु पुरट मनि रचित बनाई। कटि किंकिन कल मुखर सुहाई ॥

दो. रेखा त्रय सुन्दर उदर नाभी रुचिर गँभीर।

उर आयत भ्राजत विविध बाल विभूषन चीर ॥ ७६ ॥

अरुन पानि नख करज मनोहर। बाहु बिसाल विभूषन सुंदर ॥

कंध बाल केहरि दर ग्रीवा। चारु चिबुक आनन छबि सीवा ॥

कलबल बचन अधर अरुनारे। दुइ दुइ दसन विसद वर बारे ॥
 ललित कपोल मनोहर नासा। सकल सुखद ससि कर सम हासा ॥
 नील कंज लोचन भव मोचन। भ्राजत भाल तिलक गोरोचन ॥
 विकट भृकुटि सम श्रवन सुहाए। कुंचित कच मेचक छवि छाए ॥
 पीत झीनि झगुली तन सोही। किलकनि चितवनि भावति मोही ॥
 रूप रासि नृप अजिर बिहारी। नाचहिं निज प्रतिबिंब निहारी ॥
 मोहि सन करहीं बिबिध बिधि क्रीडा। बरनत मोहि होति अति ब्रीडा ॥
 किलकत मोहि धरन जब धावहिं। चलउँ भागि तब पूष देखावहिं ॥

दो. आवत निकट हँसहिं प्रभु भाजत रुदन कराहिं।

जाउँ समीप गहन पद फिरि फिरि चितइ पराहिं ॥ ७७(क) ॥

प्राकृत सिसु इव लीला देखि भयउ मोहि मोह।

कवन चरित्र करत प्रभु चिदानंद संदोह ॥ ७७(ख) ॥

एतना मन आनत खगराया। रघुपति प्रेरित व्यापी माया ॥
 सो माया न दुखद मोहि काहीं। आन जीव इव संसृत नाहीं ॥
 नाथ इहाँ कछु कारन आना। सुनहु सो सावधान हरिजाना ॥
 ग्यान अखंड एक सीतावर। माया बस्य जीव सचराचर ॥
 जौं सब कें रह ग्यान एकरस। ईस्वर जीवहि भेद कहहु कस ॥
 माया बस्य जीव अभिमानी। ईस बस्य माया गुनखानी ॥
 परबस जीव स्वबस भगवंता। जीव अनेक एक श्रीकंता ॥
 मुधा भेद जद्यपि कृत माया। विनु हरि जाइ न कोटि उपाया ॥

दो. रामचंद्र के भजन विनु जो चह पद निर्बान।

ग्यानवंत अपि सो नर पसु विनु पूँछ बिषान ॥ ७८(क) ॥

राकापति षोडस उअहिं तारागन समुदाइ ॥

सकल गिरिन्ह दव लाइअ विनु रवि राति न जाइ ॥ ७८(ख) ॥

ऐसेहिं हरि विनु भजन खगोसा। मिटइ न जीवन्ह केर कलेसा ॥
 हरि सेवकहि न व्याप अबिद्या। प्रभु प्रेरित व्यापइ तेहि विद्या ॥
 ताते नास न होइ दास कर। भेद भगति भाढइ बिहंगबर ॥
 भ्रम ते चकित राम मोहि देखा। बिहँसे सो सुनु चरित बिसेषा ॥
 तेहि कौतुक कर मरमु न काहँ। जाना अनुज न मातु पिताहँ ॥

जानु पानि धाए मोहि धरना। स्यामल गात अरुन कर चरना ॥
तब मैं भागि चलेउँ उरगामी। राम गहन कहँ भुजा पसारी ॥
जिमि जिमि दूरि उडाउँ अकासा। तहँ भुज हरि देखेउँ निज पासा ॥

दो. ब्रह्मलोक लागि गयेउँ मैं चितयउँ पाछ उडाता।
जुग अंगुल कर बीच सब राम भुजहि मोहि तात ॥ ७९(क) ॥
सप्तावरन भेद करि जहाँ लगें गति मोरि।
गयेउँ तहाँ प्रभु भुज निरखि ब्याकुल भयउँ बहोरि ॥ ७९(ख) ॥

मूदेउँ नयन त्रसित जब भयेउँ। पुनि चितवत कोसलपुर गयेऊँ ॥
मोहि बिलोकि राम मुसुकाहीं। बिहँसत तुरत गयेउँ मुख माहीं ॥
उदर माझ सुनु अंडज राया। देखेउँ बहु ब्रह्मांड निकाया ॥
अति बिचित्र तहँ लोक अनेका। रचना अधिक एक ते एका ॥
कोटिन्ह चतुरानन गौरीसा। अगनित उडगन रवि रजनीसा ॥
अगनित लोकपाल जम काला। अगनित भूधर भूमि बिसाला ॥
सागर सरि सर बिपिन अपारा। नाना भाँति सृष्टि बिस्तारा ॥
सुर मुनि सिद्ध नाग नर किनर। चारि प्रकार जीव सचराचर ॥

दो. जो नहिं देखा नहिं सुना जो मनहूँ न समाइ।
सो सब अद्भुत देखेउँ बरनि कवनि विधि जाइ ॥ ८०(क) ॥
एक एक ब्रह्मांड महुँ रहउँ बरष सत एक।
एहि विधि देखत फिरउँ मैं अंड कटाह अनेक ॥ ८०(ख) ॥
एहि विधि देखत फिरउँ मैं अंड कटाह अनेक ॥ ८०(ख) ॥

लोक लोक प्रति भिन्न विधाता। भिन्न बिष्नु सिव मनु दिसित्राता ॥
नर गंधर्व भूत बेताला। किनर निसिचर पसु खग ब्याला ॥
देव दनुज गन नाना जाती। सकल जीव तहँ आनहि भाँती ॥
महि सरि सागर सर गिरि नाना। सब प्रपंच तहँ आनइ आना ॥
अंडकोस प्रति प्रति निज रुपा। देखेउँ जिनस अनेक अनूपा ॥
अवधपुरी प्रति भुवन निनारी। सरजू भिन्न भिन्न नर नारी ॥
दसरथ कौसल्या सुनु ताता। विविध रूप भरतादिक भ्राता ॥
प्रति ब्रह्मांड राम अवतारा। देखेउँ बालबिनोद अपारा ॥

दो. भिन्न भिन्न मै दीख सबु अति विचित्र हरिजान।
 अगनित भुवन फिरैउँ प्रभु राम न देखेउँ आन ॥ ८१(क) ॥
 सोइ सिसुपन सोइ सोभा सोइ कृपाल रघुवीर।
 भुवन भुवन देखत फिरैउँ प्रेरित मोह समीर ॥ ८१(ख)

भ्रमत मोहि ब्रह्मांड अनेका। बीते मनहुँ कल्प सत एका ॥
 फिरत फिरत निज आश्रम आयउँ। तहँ पुनि रहि कछु काल गवाँयउँ ॥
 निज प्रभु जन्म अवध सुनि पायउँ। निर्भर प्रेम हरषि उठि धायउँ ॥
 देखैउँ जन्म महोत्सव जाई। जेहि विधि प्रथम कहाँ मैँ गाई ॥
 राम उदर देखेउँ जग नाना। देखत बनइ न जाइ बखाना ॥
 तहँ पुनि देखेउँ राम सुजाना। माया पति कृपाल भगवाना ॥
 करैउँ बिचार बहोरि बहोरी। मोह कलिल ब्यापित मति मोरी ॥
 उभय घरी महँ मैँ सब देखा। भयउँ भ्रमित मन मोह बिसेषा ॥

दो. देखि कृपाल विकल मोहि बिहँसे तब रघुवीर।
 बिहँसतहीं मुख बाहेर आयउँ सुनु मतिधीर ॥ ८२(क) ॥
 सोइ लरिकार्ई मो सन करन लगे पुनि राम।
 कोटि भाँति समुझावउँ मनु न लहइ विश्राम ॥ ८२(ख) ॥

देखि चरित यह सो प्रभुताई। समुझत देह दसा बिसराई ॥
 धरनि परेउँ मुख आव न बाता। त्राहि त्राहि आरत जन त्राता ॥
 प्रेमाकुल प्रभु मोहि बिलोकी। निज माया प्रभुता तब रोकी ॥
 कर सरोज प्रभु मम सिर धरेऊ। दीनदयाल सकल दुख हरेऊ ॥
 कीन्ह राम मोहि बिगत बिमोहा। सेवक सुखद कृपा संदोहा ॥
 प्रभुता प्रथम बिचारि बिचारी। मन महँ होइ हरष अति भारी ॥
 भगत बछलता प्रभु कै देखी। उपजी मम उर प्रीति बिसेषी ॥
 सजल नयन पुलकित कर जोरी। कीन्हैउँ बहु विधि विनय बहोरी ॥

दो. सुनि सप्रेम मम बानी देखि दीन निज दास।
 बचन सुखद गंभीर मृदु बोले रमानिवास ॥ ८३(क) ॥
 काकभसुंड़ि मागु बर अति प्रसन्न मोहि जानि।
 अनिमादिक सिधि अपर रिधि मोच्छ सकल सुख खानि ॥ ८३(ख) ॥

ग्यान बिबेक विरति विग्याना। मुनि दुर्लभ गुन जे जग नाना ॥
 आजु देउं सब संसय नाहीं। मागु जो तोहि भाव मन माहीं ॥
 सुनि प्रभु बचन अधिक अनुरागेउं। मन अनुमान करन तब लागेऊं ॥
 प्रभु कह देन सकल सुख सही। भगति आपनी देन न कही ॥
 भगति हीन गुन सब सुख ऐसे। लवन बिना बहु बिंजन जैसे ॥
 भजन हीन सुख कवने काजा। अस बिचारि बोलेउं खगराजा ॥
 जौ प्रभु होइ प्रसन्न बर देहू। मो पर करहु कृपा अरु नेहू ॥
 मन भावत बर मागुँ स्वामी। तुम्ह उदार उर अंतरजामी ॥

दो. अबिरल भगति बिसुध्द तव श्रुति पुरान जो गाव।
 जेहि खोजत जोगीस मुनि प्रभु प्रसाद कोउ पाव ॥ ८४(क) ॥
 भगत कल्पतरु प्रनत हित कृपा सिंधु सुख धाम।
 सोइ निज भगति मोहि प्रभु देहु दया करि राम ॥ ८४(ख) ॥

एवमस्तु कहि रघुकुलनायक। बोले बचन परम सुखदायक ॥
 सुनु बायस तैं सहज सयाना। काहे न मागसि अस बरदाना ॥
 सब सुख खानि भगति तैं मागी। नहिं जग कोउ तोहि सम बडभागी ॥
 जो मुनि कोटि जतन नहिं लहहीं। जे जप जोग अनल तन दहहीं ॥
 रीझेउं देखि तोरि चतुराई। मागेहु भगति मोहि अति भाई ॥
 सुनु बिहंग प्रसाद अब मोरें। सब सुभ गुन बसिहहिं उर तोरें ॥
 भगति ग्यान विग्यान विरागा। जोग चरित्र रहस्य विभागा ॥
 जानब तैं सबही कर भेदा। मम प्रसाद नहिं साधन खेदा ॥

दों.माया संभव भ्रम सब अब न व्यापिहहिं तोहि।
 जानेसु ब्रह्म अनादि अज अगुन गुनाकर मोहि ॥ ८५(क) ॥
 मोहि भगत प्रिय संतत अस बिचारि सुनु काग।
 कायँ बचन मन मम पद करेसु अचल अनुराग ॥ ८५(ख) ॥

अब सुनु परम विमल मम बानी। सत्य सुगम निगमादि बखानी ॥
 निज सिद्धांत सुनावउं तोही। सुनु मन धरु सब तजि भजु मोही ॥
 मम माया संभव संसारा। जीव चराचर बिबिधि प्रकारा ॥
 सब मम प्रिय सब मम उपजाए। सब ते अधिक मनुज मोहि भाए ॥
 तिन्ह महुँ द्विज द्विज महुँ श्रुतिधारी। तिन्ह महुँ निगम धरम अनुसारी ॥

तिन्ह महँ प्रिय विरक्त पुनि ग्यानी। ग्यानिहु ते अति प्रिय विग्यानी ॥
 तिन्ह ते पुनि मोहि प्रिय निज दासा। जेहि गति मोरि न दूसरि आसा ॥
 पुनि पुनि सत्य कहउँ तोहि पाहीं। मोहि सेवक सम प्रिय कोउ नाहीं ॥
 भगति हीन विरंचि किन होई। सब जीवहु सम प्रिय मोहि सोई ॥
 भगतिवंत अति नीचउ प्रानी। मोहि प्रानप्रिय असि मम बानी ॥

दो. सुचि सुसील सेवक सुमति प्रिय कहु काहि न लाग।

श्रुति पुरान कह नीति असि सावधान सुनु काग ॥ ८६ ॥

एक पिता के बिपुल कुमारा। होहिं पृथक गुन सील अचारा ॥
 कोउ पंडित कोउ तापस ग्याता। कोउ धनवंत सूर कोउ दाता ॥
 कोउ सर्वग्य धर्मरत कोई। सब पर पितहि प्रीति सम होई ॥
 कोउ पितु भगत बचन मन कर्मा। सपनेहुँ जान न दूसर धर्मा ॥
 सो सुत प्रिय पितु प्रान समाना। जद्यपि सो सब भाँति अयाना ॥
 एहि विधि जीव चराचर जेते। त्रिजग देव नर असुर समेते ॥
 अखिल बिस्व यह मोर उपाया। सब पर मोहि बराबरि दाया ॥
 तिन्ह महँ जो परिहरि मद माया। भजै मोहि मन बच अरू काया ॥

दो. पुरुष नपुंसक नारि वा जीव चराचर कोइ।

सर्व भाव भज कपट तजि मोहि परम प्रिय सोइ ॥ ८७(क) ॥

सो. सत्य कहउँ खग तोहि सुचि सेवक मम प्रानप्रिय।

अस बिचारि भजु मोहि परिहरि आस भरोस सब ॥ ८७(ख) ॥

कबहूँ काल न व्यापिहि तोही। सुमिरेसु भजेसु निरंतर मोही ॥
 प्रभु बचनामृत सुनि न अघाऊँ। तनु पुलकित मन अति हरषाऊँ ॥
 सो सुख जानइ मन अरु काना। नहिं रसना पहिं जाइ बखाना ॥
 प्रभु सोभा सुख जानहिं नयना। कहि किमि सकहिं तिन्हहि नहिं बयना ॥
 बहु विधि मोहि प्रबोधि सुख देई। लगे करन सिसु कौतुक तेई ॥
 सजल नयन कछु मुख करि रूखा। चितइ मातु लागी अति भूखा ॥
 देखि मातु आतुर उठि धाई। कहि मूढु बचन लिए उर लाई ॥
 गोद राखि कराव पय पाना। रघुपति चरित ललित कर गाना ॥

सो. जेहि सुख लागि पुरारि असुभ बेष कृत सिव सुखद।

अवधपुरी नर नारि तेहि सुख महँ संतत मगन ॥ ८८(क) ॥

सोइ सुख लवलेस जिन्ह बारक सपनेहुँ लहेउ।

ते नहिं गनहिं खगेस ब्रह्मसुखहि सज्जन सुमति ॥ ८८(ख) ॥

मैं पुनि अवध रहेउँ कछु काला। देखेउँ बालबिनोद रसाला ॥

राम प्रसाद भगति बर पायउँ। प्रभु पद बंदि निजाश्रम आयउँ ॥

तब ते मोहि न ब्यापी माया। जब ते रघुनायक अपनाया ॥

यह सब गुप्त चरित मैं गावा। हरि मायाँ जिमि मोहि नचावा ॥

निज अनुभव अब कहउँ खगेसा। बिनु हरि भजन न जाहि कलेसा ॥

राम कृपा बिनु सुनु खगराई। जानि न जाइ राम प्रभुताई ॥

जानें बिनु न होइ परतीती। बिनु परतीति होइ नहिं प्रीती ॥

प्रीति बिना नहिं भगति दिढाई। जिमि खगपति जल कै चिकनाई ॥

सो. बिनु गुर होइ कि ग्यान ग्यान कि होइ बिराग बिनु।

गावहिं वेद पुरान सुख कि लहिअ हरि भगति बिनु ॥ ८९(क) ॥

कोउ विश्राम कि पाव तात सहज संतोष बिनु।

चलै कि जल बिनु नाव कोटि जतन पचि पचि मरिअ ॥ ८९(ख) ॥

बिनु संतोष न काम नसाहीं। काम अछत सुख सपनेहुँ नाहीं ॥

राम भजन बिनु मिटहिं कि कामा। थल बिहीन तरु कबहुँ कि जामा ॥

बिनु विग्यान कि समता आवइ। कोउ अवकास कि नभ बिनु पावइ ॥

श्रद्धा बिना धर्म नहिं होई। बिनु महि गंध कि पावइ कोई ॥

बिनु तप तेज कि कर बिस्तारा। जल बिनु रस कि होइ संसारा ॥

सील कि मिल बिनु बुध सेवकाई। जिमि बिनु तेज न रूप गोसाई ॥

निज सुख बिनु मन होइ कि थीरा। परस कि होइ बिहीन समीरा ॥

कवनिउ सिद्धि कि बिनु बिस्वासा। बिनु हरि भजन न भव भय नासा ॥

दो. बिनु बिस्वास भगति नहिं तेहि बिनु द्रवहिं न रामु।

राम कृपा बिनु सपनेहुँ जीव न लह बिश्रामु ॥ ९०(क) ॥

सो. अस बिचारि मतिधीर तजि कुतर्क संसय सकल।

भजहु राम रघुवीर करुनाकर सुंदर सुखद ॥ ९०(ख) ॥

निज मति सरिस नाथ मैं गाई। प्रभु प्रताप महिमा खगराई ॥

कहेउँ न कछु करि जुगुति बिसेषी। यह सब मैं निज नयनन्हि देखी ॥

महिमा नाम रूप गुन गाथा। सकल अमित अनंत रघुनाथा ॥

निज निज मति मुनि हरि गुन गावहिं । निगम सेष सिव पार न पावहिं ॥
 तुम्हहि आदि खग मसक प्रजंता । नभ उडाहिं नहिं पावहिं अंता ॥
 तिमि रघुपति महिमा अवगाहा । तात कबहुँ कोउ पाव कि थाहा ॥
 रामु काम सत कोटि सुभग तन । दुर्गा कोटि अमित अरि मर्दन ॥
 सक्र कोटि सत सरिस बिलासा । नभ सत कोटि अमित अवकासा ॥

दो. मरुत कोटि सत विपुल बल रवि सत कोटि प्रकास ।
 ससि सत कोटि सुसीतल समन सकल भव त्रास ॥ ९१(क) ॥
 काल कोटि सत सरिस अति दुस्तर दुर्ग दुरंत ।
 धूमकेतु सत कोटि सम दुराधरष भगवंत ॥ ९१(ख) ॥

प्रभु अगाध सत कोटि पताला । समन कोटि सत सरिस कराला ॥
 तीरथ अमित कोटि सम पावन । नाम अखिल अघ पूग नसावन ॥
 हिमगिरि कोटि अचल रघुबीरा । सिंधु कोटि सत सम गंभीरा ॥
 कामधेनु सत कोटि समाना । सकल काम दायक भगवाना ॥
 सारद कोटि अमित चतुराई । विधि सत कोटि सृष्टि निपुनाई ॥
 बिष्नु कोटि सम पालन कर्ता । रुद्र कोटि सत सम संहर्ता ॥
 धनद कोटि सत सम धनवाना । माया कोटि प्रपंच निधाना ॥
 भार धरन सत कोटि अहीसा । निरवधि निरुपम प्रभु जगदीसा ॥

छं. निरुपम न उपमा आन राम समान रामु निगम कहै ।
 जिमि कोटि सत खद्योत सम रवि कहत अति लघुता लहै ॥
 एहि भाँति निज निज मति बिलास मुनिस हरिहि बखानहीं ।
 प्रभु भाव गाहक अति कृपाल सप्रेम सुनि सुख मानहीं ॥

दो. रामु अमित गुन सागर थाह कि पावइ कोइ ।
 संतन्ह सन जस किछु सुनेउँ तुम्हहि सुनायउँ सोइ ॥ ९२(क) ॥

सो. भाव बस्य भगवान सुख निधान करुना भवन ।
 तजि ममता मद मान भजिअ सदा सीता रवन ॥ ९२(ख) ॥

सुनि भुसुंढि के बचन सुहाए । हरषित खगपति पंख फुलाए ॥
 नयन नीर मन अति हरषाना । श्रीरघुपति प्रताप उर आना ॥
 पाछिल मोह समुझि पछिताना । ब्रह्म अनादि मनुज करि माना ॥

पुनि पुनि काग चरन सिरु नावा। जानि राम सम प्रेम बढ़ावा ॥
गुर बिनु भव निधि तरइ न कोई। जौं बिरंचि संकर सम होई ॥
संसय सर्प ग्रसेउ मोहि ताता। दुखद लहरि कुतर्क बहु ब्राता ॥
तव सरूप गारुडि रघुनायक। मोहि जिआयउ जन सुखदायक ॥
तव प्रसाद मम मोह नसाना। राम रहस्य अनूपम जाना ॥

दो. ताहि प्रसंसि विविध विधि सीस नाइ कर जोरि।

बचन बिनीत सप्रेम मृदु बोलेउ गरुड बहोरि ॥ ९३(क) ॥

प्रभु अपने अबिबेक ते बूझउँ स्वामी तोहि।

कृपासिंधु सादर कहहु जानि दास निज मोहि ॥ ९३(ख) ॥

तुम्ह सर्वग्य तन्य तम पारा। सुमति सुसील सरल आचारा ॥
ग्यान बिरति विग्यान निवासा। रघुनायक के तुम्ह प्रिय दासा ॥
कारन कवन देह यह पाई। तात सकल मोहि कहहु बुझाई ॥
राम चरित सर सुंदर स्वामी। पायहु कहाँ कहहु नभगामी ॥
नाथ सुना मै अस सिव पाहीं। महा प्रलयहुँ नास तव नाहीं ॥
मुधा बचन नहि ईस्वर कहई। सोउ मोरें मन संसय अहई ॥
अग जग जीव नाग नर देवा। नाथ सकल जगु काल कलेवा ॥
अंड कटाह अमित लय कारी। कालु सदा दुरतिक्रम भारी ॥

सो. तुम्हहि न व्यापत काल अति कराल कारन कवन।

मोहि सो कहहु कृपाल ग्यान प्रभाव कि जोग बल ॥ ९४(क) ॥

दो. प्रभु तव आश्रम आएँ मोर मोह भ्रम भाग।

कारन कवन सो नाथ सब कहहु सहित अनुराग ॥ ९४(ख) ॥

गरुड गिरा सुनि हरषेउ कागा। बोलेउ उमा परम अनुरागा ॥
धन्य धन्य तव मति उरगारी। प्रसन्न तुम्हारि मोहि अति प्यारी ॥
सुनि तव प्रसन्न सप्रेम सुहाई। बहुत जनम कै सुधि मोहि आई ॥
सब निज कथा कहउँ मै गाई। तात सुनहु सादर मन लाई ॥
जप तप मख सम दम व्रत दाना। बिरति विबेक जोग विग्याना ॥
सब कर फल रघुपति पद प्रेमा। तेहि बिनु कोउ न पावइ छेमा ॥
एहि तन राम भगति मै पाई। ताते मोहि ममता अधिकाई ॥
जेहि तें कछु निज स्वारथ होई। तेहि पर ममता कर सब कोई ॥

सो. पन्नगारि असि नीति श्रुति संमत सज्जन कहहिं।

अति नीचहु सन प्रीति करिअ जानि निज परम हित ॥ ९५(क) ॥

पाट कीट तें होइ तेहि तें पाटंबर रुचिर।

कृमि पालइ सबु कोइ परम अपावन प्रान सम ॥ ९५(ख) ॥

स्वारथ साँच जीव कहूँ एहा। मन क्रम बचन राम पद नेहा ॥

सोइ पावन सोइ सुभग सरीरा। जो तनु पाइ भजिअ रघुबीरा ॥

राम बिमुख लहि विधि सम देही। कबि कोबिद न प्रसंसाहिं तेही ॥

राम भगति एहिं तन उर जामी। ताते मोहि परम प्रिय स्वामी ॥

तजउँ न तन निज इच्छा मरना। तन विनु बेद भजन नहिं बरना ॥

प्रथम मोहँ मोहि बहुत बिगोवा। राम बिमुख सुख कबहुँ न सोवा ॥

नाना जनम कर्म पुनि नाना। किए जोग जप तप मख दाना ॥

कवन जोनि जनमेउँ जहँ नाहीं। मैं खगोस भ्रमि भ्रमि जग माहीं ॥

देखेउँ करि सब करम गोसाईं। सुखी न भयउँ अबहिं की नाई ॥

सुधि मोहि नाथ जन्म बहु केरी। सिव प्रसाद मति मोहँ न घेरी ॥

दो. प्रथम जन्म के चरित अब कहउँ सुनहु बिहगोस।

सुनि प्रभु पद रति उपजइ जातें मिटहिं कलेस ॥ ९६(क) ॥

पूरुब कल्प एक प्रभु जुग कलिजुग मल मूल ॥

नर अरु नारि अधर्म रत सकल निगम प्रतिकूल ॥ ९६(ख) ॥

तेहि कलिजुग कोसलपुर जाई। जन्मत भयउँ सूद्र तनु पाई ॥

सिव सेवक मन क्रम अरु बानी। आन देव निंदक अभिमानी ॥

धन मद मत्त परम बाचाला। उग्रबुद्धि उर दंभ बिसाला ॥

जदपि रहेउँ रघुपति रजधानी। तदपि न कछु महिमा तब जानी ॥

अब जाना मैं अवध प्रभावा। निगमागम पुरान अस गावा ॥

कवनेहुँ जन्म अवध बस जोई। राम परायन सो परि होई ॥

अवध प्रभाव जान तब प्रानी। जब उर बसहिं रामु धनुपानी ॥

सो कलिकाल कठिन उरगारी। पाप परायन सब नर नारी ॥

दो. कलिमल ग्रसे धर्म सब लुप्त भए सदग्रंथ।

दंभिन्ह निज मति कल्पि करि प्रगट किए बहु पंथ ॥ ९७(क) ॥

भए लोग सब मोहबस लोभ ग्रसे सुभ कर्म।

सुनु हरिजान ग्यान निधि कहउँ कल्युक्त कलिधर्म ॥ ९७(ख) ॥

बरन धर्म नहि आश्रम चारी। श्रुति विरोध रत सब नर नारी ॥
द्विज श्रुति बेचक भूप प्रजासन। कोउ नहि मान निगम अनुसासन ॥
मारग सोइ जा कहूँ जोइ भावा। पंडित सोइ जो गाल बजावा ॥
मिथ्यारंभ दंभ रत जोई। ता कहूँ संत कहइ सब कोई ॥
सोइ सयान जो परधन हारी। जो कर दंभ सो बड आचारी ॥
जौ कह झूँठ मसरखरी जाना। कलिजुग सोइ गुनवंत बखाना ॥
निराचार जो श्रुति पथ त्यागी। कलिजुग सोइ ग्यानी सो बिरागी ॥
जाकें नख अरु जटा बिसाला। सोइ तापस प्रसिद्ध कलिकाला ॥

दो. असुभ बेष भूषन धरें भच्छाभच्छ जे खाहिं।

तेइ जोगी तेइ सिद्ध नर पूज्य ते कलिजुग माहिं ॥ ९८(क) ॥

सो. जे अपकारी चार तिन्ह कर गौरव मान्य तेइ।

मन क्रम बचन लबार तेइ बकता कलिकाल महूँ ॥ ९८(ख) ॥

नारि बिबस नर सकल गोसाई। नाचहिं नट मर्कट की नाई ॥
सूद्र द्विजन्ह उपदेसहिं ग्याना। मेलि जनेऊ लेहिं कुदाना ॥
सब नर काम लोभ रत क्रोधी। देव बिप्र श्रुति संत विरोधी ॥
गुन मंदिर सुंदर पति त्यागी। भजहिं नारि पर पुरुष अभागी ॥
सौभागिनीं विभूषन हीना। बिधवन्ह के सिंगार नबीना ॥
गुर सिष बधिर अंध का लेखा। एक न सुनइ एक नहिं देखा ॥
हरइ सिष्य धन सोक न हरई। सो गुर घोर नरक महूँ परई ॥
मातु पिता बालकन्हि बोलाबहिं। उदर भरै सोइ धर्म सिखावहिं ॥

दो. ब्रह्म ग्यान बिनु नारि नर कहहिं न दूसरि बात।

कौडी लागि लोभ बस करहिं बिप्र गुर घात ॥ ९९(क) ॥

बादहिं सूद्र द्विजन्ह सन हम तुम्ह ते कछु घाटि।

जानइ ब्रह्म सो बिप्रवर आँखि देखावहिं डाटि ॥ ९९(ख) ॥

पर त्रिय लंपट कपट सयाने। मोह द्रोह ममता लपटाने ॥
तेइ अभेदवादी ग्यानी नर। देखा में चरित्र कलिजुग कर ॥
आपु गए अरु तिन्हइ घालहिं। जे कहूँ सत मारग प्रतिपालहिं ॥
कल्प कल्प भरि एक एक नरका। परहिं जे दूषहिं श्रुति करि तरका ॥

जे बरनाधम तेलि कुम्हारा। स्वपच किरात कोल कलवारा ॥
 नारि मुई गृह संपति नासी। मूड मुडाइ होहिं सन्यासी ॥
 ते बिप्रन्ह सन आपु पुजावहिं। उभय लोक निज हाथ नसावहिं ॥
 विप्र निरच्छर लोलुप कामी। निराचार सठ वृषली स्वामी ॥
 सूद्र करहिं जप तप व्रत नाना। बैठि बरासन कहहिं पुराना ॥
 सब नर कल्पित करहिं अचारा। जाइ न बरनि अनीति अपारा ॥

दो. भए बरन संकर कलि भिन्नसेतु सब लोग।

करहिं पाप पावहिं दुख भय रुज सोक बियोग ॥ १००(क) ॥

श्रुति संमत हरि भक्ति पथ संजुत बिरति बिबेक।

तेहि न चलहिं नर मोह बस कल्पहिं पंथ अनेक ॥ १००(ख) ॥

छं. बहु दाम सँवारहिं धाम जती। बिषया हरि लीन्हि न रहि बिरती ॥

तपसी धनवंत दरिद्र गृही। कलि कौतुक तात न जात कही ॥

कुलवंति निकारहिं नारि सती। गृह आनिहिं चेरी निबेरि गती ॥

सुत मानहिं मातु पिता तब लौं। अबलानन दीख नहीं जब लौं ॥

ससुरारि पिआरि लगी जब तें। रिपरूप कुटुंब भए तब तें ॥

नृप पाप परायन धर्म नहीं। करि दंड बिडंब प्रजा नितहीं ॥

धनवंत कुलीन मलीन अपी। द्विज चिन्ह जनेउ उधार तपी ॥

नहिं मान पुरान न बेदहि जो। हरि सेवक संत सही कलि सो।

कवि बृंद उदार दुनी न सुनी। गुन दूषक ब्रात न कोपि गुनी ॥

कलि बारहिं बार दुकाल परै। विनु अन्न दुखी सब लोग मरै ॥

दो. सुनु खगेस कलि कपट हठ दंभ द्वेष पाषंड।

मान मोह मारादि मद व्यापि रहे ब्रह्मंड ॥ १०१(क) ॥

तामस धर्म करहिं नर जप तप व्रत मख दान।

देव न बरषहिं धरनीं बए न जामहिं धान ॥ १०१(ख) ॥

छं. अबला कच भूषन भूरि लुधा। धनहीन दुखी ममता बहुधा ॥

सुख चाहहिं मूढ न धर्म रता। मति थोरि कठोरि न कोमलता ॥ १ ॥

नर पीडित रोग न भोग कहीं। अभिमान बिरोध अकारनहीं ॥

लघु जीवन संबतु पंच दसा। कलपांत न नास गुमानु असा ॥ २ ॥

कलिकाल बिहाल किए मनुजा। नहिं मानत कौ अनुजा तनुजा।
नहिं तोष बिचार न सीतलता। सब जाति कुजाति भए मगता ॥ ३ ॥

इरिषा परुषाच्छर लोलुपता। भरि पूरि रही समता विगता ॥
सब लोग बियोग बिसोक हुए। बरनाश्रम धर्म अचार गए ॥ ४ ॥

दम दान दया नहिं जानपनी। जडता परबंचनताति घनी ॥
तनु पोषक नारि नरा सगरे। परनिंदक जे जग मो बगरे ॥ ५ ॥

दो. सुनु ब्यालारि काल कलि मल अवगुन आगार।
गुनउँ बहुत कलिजुग कर विनु प्रयास निस्तार ॥ १०२(क) ॥

कृतजुग त्रेता द्वापर पूजा मख अरु जोग।
जो गति होइ सो कलि हरि नाम ते पावहिं लोग ॥ १०२(ख) ॥

कृतजुग सब जोगी बिग्यानी। करि हरि ध्यान तरहिं भव प्रानी ॥
त्रेताँ विबिध जग्य नर करहीं। प्रभुहि समर्पि कर्म भव तरहीं ॥
द्वापर करि रघुपति पद पूजा। नर भव तरहिं उपाय न दूजा ॥
कलिजुग केवल हरि गुन गाहा। गावत नर पावहिं भव थाहा ॥
कलिजुग जोग न जग्य न ग्याना। एक अधार राम गुन गाना ॥
सब भरोस तजि जो भज रामहि। प्रेम समेत गाव गुन ग्रामहि ॥
सोइ भव तर कछु संसय नाहीं। नाम प्रताप प्रगट कलि माहीं ॥
कलि कर एक पुनीत प्रतापा। मानस पुन्य होहिं नहिं पापा ॥

दो. कलिजुग सम जुग आन नहिं जौं नर कर बिस्वास।
गाइ राम गुन गन बिमलँ भव तर विनहिं प्रयास ॥ १०३(क) ॥

प्रगट चारि पद धर्म के कलिल महुँ एक प्रधान।
जेन केन बिधि दीन्हें दान करइ कल्यान ॥ १०३(ख) ॥

नित जुग धर्म होहिं सब केरे। हृदयँ राम माया के प्रेरे ॥
सुद्ध सत्व समता बिग्याना। कृत प्रभाव प्रसन्न मन जाना ॥
सत्व बहुत रज कछु रति कर्मा। सब बिधि सुख त्रेता कर धर्मा ॥
बहु रज स्वल्प सत्व कछु तामस। द्वापर धर्म हरष भय मानस ॥
तामस बहुत रजोगुन थोरा। कलि प्रभाव बिरोध चहुँ ओरा ॥
बुध जुग धर्म जानि मन माहीं। तजि अधर्म रति धर्म कराहीं ॥

काल धर्म नहिं ब्यापहिं ताही। रघुपति चरन प्रीति अति जाही ॥
नट कृत बिकट कपट खगराया। नट सेवकहि न ब्यापइ माया ॥

दो. हरि माया कृत दोष गुन विनु हरि भजन न जाहिं।
भजिअ राम तजि काम सब अस विचारि मन माहिं ॥ १०४(क) ॥
तेहि कलिकाल बरष बहु बसेउँ अवध बिहगोस।
परेउ दुकाल विपति बस तब मैं गयउँ विदेस ॥ १०४(ख) ॥

गयउँ उजेनी सुनु उरगारी। दीन मलीन दरिद्र दुखारी ॥
गएँ काल कछु संपति पाई। तहँ पुनि करउँ संभु सेवकाई ॥
विप्र एक बैदिक सिव पूजा। करइ सदा तेहि काजु न दूजा ॥
परम साधु परमारथ बिंदक। संभु उपासक नहिं हरि निंदक ॥
तेहि सेवउँ मैं कपट समेता। द्विज दयाल अति नीति निकेता ॥
बाहिज नम्र देखि मोहि साई। विप्र पढाव पुत्र की नाई ॥
संभु मंत्र मोहि द्विजबर दीन्हा। सुभ उपदेस विविध विधि कीन्हा ॥
जपउँ मंत्र सिव मंदिर जाई। हृदयँ दंभ अहमिति अधिकाई ॥

दो. मैं खल मल संकुल मति नीच जाति बस मोह।
हरि जन द्विज देखें जरउँ करउँ बिष्नु कर द्रोह ॥ १०५(क) ॥

सो. गुर नित मोहि प्रबोध दुखित देखि आचरन मम।
मोहि उपजइ अति क्रोध दंभिहि नीति कि भावई ॥ १०५(ख) ॥

एक बार गुर लीन्ह बोलाई। मोहि नीति बहु भाँति सिखाई ॥
सिव सेवा कर फल सुत सोई। अबिरल भगति राम पद होई ॥
रामहि भजहिं तात सिव धाता। नर पावँर कै केतिक बाता ॥
जासु चरन अज सिव अनुरागी। तातु द्रोहँ सुख चहसि अभागी ॥
हर कहँ हरि सेवक गुर कहेऊ। सुनि खगनाथ हृदय मम दहेऊ ॥
अधम जाति मैं बिद्या पाएँ। भयउँ जथा अहि दूध पिआएँ ॥
मानी कुटिल कुभाग्य कुजाती। गुर कर द्रोह करउँ दिनु राती ॥
अति दयाल गुर स्वल्प न क्रोधा। पुनि पुनि मोहि सिखाव सुबोधा ॥
जेहि ते नीच बडाई पावा। सो प्रथमहिं हति ताहि नसावा ॥
धूम अनल संभव सुनु भाई। तेहि बुझाव घन पदवी पाई ॥
रज मग परी निरादर रहई। सब कर पद प्रहार नित सहई ॥

मरुत उडाव प्रथम तेहि भरई। पुनि नृप नयन किरीटन्ह परई ॥
सुनु खगपति अस समुझि प्रसंगा। बुध नहिं करहिं अधम कर संग्गा ॥
कवि कोविद गावहिं असि नीती। खल सन कलह न भल नहिं प्रीती ॥
उदासीन नित रहिअ गोसाईं। खल परिहरिअ स्वान की नाई ॥
मैं खल हृदयँ कपट कुटिलाई। गुर हित कहइ न मोहि सोहाई ॥

दो. एक बार हर मंदिर जपत रहेउँ सिव नाम।

गुर आयउ अभिमान तें उठि नहिं कीन्ह प्रनाम ॥ १०६(क) ॥

सो दयाल नहिं कहेउ कछु उर न रोष लवलेस।

अति अघ गुर अपमानता सहि नहिं सके महेस ॥ १०६(ख) ॥

मंदिर माझ भई नभ बानी। रे हतभाग्य अग्य अभिमानी ॥
जद्यपि तव गुर कें नहिं क्रोधा। अति कृपाल चित सम्यक बोधा ॥
तदपि साप सठ दैहउँ तोही। नीति विरोध सोहाइ न मोही ॥
जौं नहिं दंड करौं खल तोरा। भ्रष्ट होइ श्रुतिमारग मोरा ॥
जे सठ गुर सन इरिषा करहीं। रौरव नरक कोटि जुग परहीं ॥
त्रिजग जोनि पुनि धरहिं सरीरा। अयुत जन्म भरि पावहिं पीरा ॥
बैठ रहेसि अजगर इव पापी। सर्प होहि खल मल मति व्यापी ॥
महा बिटप कोटर महुँ जाई ॥ रहु अधमाधम अधगति पाई ॥

दो. हाहाकार कीन्ह गुर दारुन सुनि सिव साप ॥

कंपित मोहि बिलोकि अति उर उपजा परिताप ॥ १०७(क) ॥

करि दंडवत सप्रेम द्विज सिव सन्मुख कर जोरि।

बिनय करत गदगद स्वर समुझि घोर गति मोरि ॥ १०७(ख) ॥

नमामीशमीशान निर्वाणरूपं। विभुं व्यापकं ब्रह्म वेदस्वरूपं।
निजं निर्गुणं निर्विकल्पं निरीहं। चिदाकाशमाकाशवासं भजेऽहं ॥
निराकारमोंकारमूलं तुरीयं। गिरा ग्यान गोतीतमीशं गिरीशं ॥
करालं महाकाल कालं कृपालं। गुणागार संसारपारं नतोऽहं ॥
तुषाराद्रि संकाश गौरं गभीरं। मनोभूत कोटि प्रभा श्री शरीरं ॥
स्फुरन्मौलि कल्लोलिनी चारु गंगा। लसद्भालबालेन्दु कंठे भुजंगा ॥
चलत्कुंडलं भ्रू सुनेत्रं विशालं। प्रसन्नाननं नीलकंठं दयालं ॥
मृगाधीशचर्माम्बरं मुण्डमालं। प्रियं शंकरं सर्वनाथं भजामि ॥

प्रचंडं प्रकृष्टं प्रगल्भं परेशं। अखंडं अजं भानुकोटिप्रकाशं ॥
 त्रयःशूल निर्मूलनं शूलपाणिं। भजेऽहं भवानीपतिं भावगम्यं ॥
 कलातीत कल्याण कल्पान्तकारी। सदा सज्जनान्ददाता पुरारी ॥
 चिदानंदसंदोह मोहापहारी। प्रसीद प्रसीद प्रभो मन्मथारी ॥
 न यावद् उमानाथ पादारविन्दं। भजंतीह लोके परे वा नराणां ॥
 न तावत्सुखं शान्ति सन्तापनाशं। प्रसीद प्रभो सर्वभूताधिवासं ॥
 न जानामि योगं जपं नैव पूजां। नतोऽहं सदा सर्वदा शंभु तुभ्यं ॥
 जरा जन्म दुःखौघ तातप्यमानं। प्रभो पाहि आपन्नमामीश शंभो ॥
 श्लोक-रुद्राष्टकमिदं प्रोक्तं विप्रेण हरतोषये।

ये पठन्ति नरा भक्त्या तेषां शम्भुः प्रसीदति ॥ ९ ॥

दो. -सुनि बिनती सर्वग्य सिव देखि ब्रिप्र अनुरागु।
 पुनि मंदिर नभवानी भइ द्विजवर वर मागु ॥ १०८(क) ॥
 जौं प्रसन्न प्रभु मो पर नाथ दीन पर नेहु।
 निज पद भगति देइ प्रभु पुनि दूसर वर देहु ॥ १०८(ख) ॥
 तव माया बस जीव जड संतत फिरइ भुलान।
 तेहि पर क्रोध न करिअ प्रभु कृपा सिंधु भगवान ॥ १०८(ग) ॥
 संकर दीनदयाल अब एहि पर होहु कृपाल।
 साप अनुग्रह होइ जेहि नाथ थोरेही काल ॥ १०८(घ) ॥

एहि कर होइ परम कल्याना। सोइ करहु अब कृपानिधाना ॥
 विप्रगिरा सुनि परहित सानी। एवमस्तु इति भइ नभवानी ॥
 जदपि कीन्ह एहिं दारुन पापा। मैं पुनि दीन्ह कोप करि सापा ॥
 तदपि तुम्हार साधुता देखी। करिहउँ एहि पर कृपा बिसेषी ॥
 छमासील जे पर उपकारी। ते द्विज मोहि प्रिय जथा खरारी ॥
 मोर श्राप द्विज व्यर्थ न जाइहि। जन्म सहस अवस्य यह पाइहि ॥
 जनमत मरत दुसह दुख होई। अहि स्वल्पउ नहिं व्यापिहि सोई ॥
 कवनेउँ जन्म मिटिहि नहिं ग्याना। सुनहिं सूद मम वचन प्रवाना ॥
 रघुपति पुरी जन्म तब भयऊ। पुनि तैं मम सेवाँ मन दयऊ ॥
 पुरी प्रभाव अनुग्रह मोरें। राम भगति उपजिहि उर तोरें ॥
 सुनु मम वचन सत्य अब भाई। हरितोषन व्रत द्विज सेवकाई ॥

अब जनि करहि बिप्र अपमाना। जानेहु संत अनंत समाना ॥
 इंद्र कुलिस मम सूल बिसाला। कालदंड हरि चक्र कराला ॥
 जो इन्ह कर मारा नहिं मरई। बिप्रद्रोह पावक सो जरई ॥
 अस विवेक राखेहु मन माहीं। तुम्ह कहँ जग दुर्लभ कछु नाहीं ॥
 औरउ एक आसिषा मोरी। अप्रतिहत गति होइहि तोरी ॥

दो. सुनि सिव बचन हरषि गुर एवमस्तु इति भाषि।

मोहि प्रबोधि गयउ गृह संभु चरन उर राखि ॥ १०९(क) ॥

प्रेरित काल विधि गिरि जाइ भयउँ मैं ब्याल।

पुनि प्रयास विनु सो तनु जजेउँ गएँ कछु काल ॥ १०९(ख) ॥

जोइ तनु धरउँ तजउँ पुनि अनायास हरिजान।

जिमि नूतन पट पहिरइ नर परिहरइ पुरान ॥ १०९(ग) ॥

सिवँ राखी श्रुति नीति अरु मैं नहिं पावा क्लेस।

एहि बिधि धरेउँ बिबिध तनु ग्यान न गयउ खगेस ॥ १०९(घ) ॥

त्रिजग देव नर जोइ तनु धरउँ। तहँ तहँ राम भजन अनुसरऊँ ॥

एक सूल मोहि बिसर न काऊ। गुर कर कोमल सील सुभाऊ ॥

चरम देह द्विज कै मैं पाई। सुर दुर्लभ पुरान श्रुति गाई ॥

खेलउँ तहँ बालकन्ह मीला। करउँ सकल रघुनायक लीला ॥

प्रौढ भएँ मोहि पिता पढावा। समझउँ सुनउँ गुनउँ नहिं भावा ॥

मन ते सकल बासना भागी। केवल राम चरन लय लागी ॥

कहु खगेस अस कवन अभागी। खरी सेव सुरधेनुहि त्यागी ॥

प्रेम मगन मोहि कछु न सोहाई। हारेउ पिता पढाइ पढाई ॥

भए कालबस जब पितु माता। मैं बन गयउँ भजन जनत्राता ॥

जहँ जहँ विपिन मुनीस्वर पावउँ। आश्रम जाइ जाइ सिरु नावउँ ॥

बूझत तिन्हहि राम गुन गाहा। कहहिं सुनउँ हरषित खगनाहा ॥

सुनत फिरउँ हरि गुन अनुबादा। अब्याहत गति संभु प्रसादा ॥

छूटी त्रिविध ईषना गाढी। एक लालसा उर अति बाढी ॥

राम चरन बारिज जब देखौं। तब निज जन्म सफल करि लेखौं ॥

जेहि पूँछउँ सोइ मुनि अस कहई। ईस्वर सर्व भूतमय अहई ॥

निर्गुन मत नहिं मोहि सोहाई। सगुन ब्रह्म रति उर अधिकाई ॥

दो. गुर के बचन सुरति करि राम चरन मनु लाग।
 रघुपति जस गावत फिरउँ छन छन नव अनुराग ॥ ११०(क) ॥
 मेरु सिखर बट छायाँ मुनि लोमस आसीन।
 देखि चरन सिरु नायउँ बचन कहेउँ अति दीन ॥ ११०(ख) ॥
 सुनि मम बचन बिनीत महु मुनि कृपाल खगराज।
 मोहि सादर पूँछत भए द्विज आयहु केहि काज ॥ ११०(ग) ॥
 तब मैं कहा कृपानिधि तुम्ह सर्वग्य सुजान।
 सगुन ब्रह्म अवराधन मोहि कहहु भगवान ॥ ११०(घ) ॥

तब मुनिष रघुपति गुन गाथा। कहे कछुक सादर खगनाथा ॥
 ब्रह्मग्यान रत मुनि बिग्यानि। मोहि परम अधिकारी जानी ॥
 लागे करन ब्रह्म उपदेसा। अज अद्वैत अगुन हृदयेसा ॥
 अकल अनीह अनाम अरुपा। अनुभव गम्य अखंड अनूपा ॥
 मन गोतीत अमल अबिनासी। निर्बिकार निरवधि सुख रासी ॥
 सो तैं ताहि तोहि नहिँ भेदा। बारि बीचि इव गावहि बेदा ॥
 विविध भाँति मोहि मुनि समुझावा। निर्गुन मत मम हृदयँ न आवा ॥
 पुनि मैं कहेउँ नाइ पद सीसा। सगुन उपासन कहहु मुनीसा ॥
 राम भगति जल मम मन मीना। किमि बिलगाइ मुनीस प्रबीना ॥
 सोइ उपदेस कहहु करि दाया। निज नयनन्हि देखौँ रघुराया ॥
 भरि लोचन बिलोकि अवधेसा। तब सुनिहउँ निर्गुन उपदेसा ॥
 मुनि पुनि कहि हरिकथा अनूपा। खंडि सगुन मत अगुन निरूपा ॥
 तब मैं निर्गुन मत कर दूरी। सगुन निरूपउँ करि हठ भूरी ॥
 उत्तर प्रतिउत्तर मैं कीन्हा। मुनि तन भए क्रोध के चीन्हा ॥
 सुनु प्रभु बहुत अवग्या किएँ। उपज क्रोध ग्यानिन्ह के हिएँ ॥
 अति संघरषन जौँ कर कोई। अनल प्रगट चंदन ते होई ॥

दो. -बारंबार सकोप मुनि करइ निरुपन ग्यान।
 मैं अपनैं मन बैठ तब करउँ विविध अनुमान ॥ १११(क) ॥
 क्रोध कि द्वैतबुद्धि बिनु द्वैत कि बिनु अग्यान।
 मायाबस परिछिन्न जड जीव कि ईस समान ॥ १११(ख) ॥
 कबहुँ कि दुख सब कर हित ताकें। तेहि कि दरिद्र परस मनि जाकें ॥

परद्रोही की होहि निसंका। कामी पुनि कि रहहि अकलंका ॥
 बंस कि रह द्विज अनहित कीन्हें। कर्म कि होहि स्वरूपहि चीन्हें ॥
 काहू सुमति कि खल सँग जामी। सुभ गति पाव कि परत्रिय गामी ॥
 भव कि परहिं परमात्मा बिंदक। सुखी कि होहि कबहुँ हरिनिंदक ॥
 राजु कि रहइ नीति बिनु जानें। अघ कि रहहिं हरिचरित बखानें ॥
 पावन जस कि पुन्य बिनु होई। बिनु अघ अजस कि पावइ कोई ॥
 लाभु कि किछु हरि भगति समाना। जेहि गावहिं श्रुति संत पुराना ॥
 हानि कि जग एहि सम किछु भाई। भजिअ न रामहि नर तनु पाई ॥
 अघ कि पिसुनता सम कछु आना। धर्म कि दया सरिस हरिजाना ॥
 एहि विधि अमिति जुगुति मन गुनऊँ। मुनि उपदेस न सादर सुनऊँ ॥
 पुनि पुनि सगुन पच्छ मैं रोपा। तब मुनि बोलेउ बचन सकोपा ॥
 मूढ परम सिख देउँ न मानसि। उत्तर प्रतिउत्तर बहु आनसि ॥
 सत्य बचन बिस्वास न करही। बायस इव सबही ते डरही ॥
 सठ स्वपच्छ तब हृदयँ बिसाला। सपदि होहि पच्छी चंडाला ॥
 लीन्ह श्राप मैं सीस चढाई। नहिं कछु भय न दीनता आई ॥

दो. तुरत भयउँ मैं काग तब पुनि मुनि पद सिरु नाइ।

सुमिरि राम रघुबंस मनि हरषित चलेउँ उडाइ ॥ ११२(क) ॥

उमा जे राम चरन रत विगत काम मद क्रोध ॥

निज प्रभुमय देखहिं जगत केहि सन करहिं बिरोध ॥ ११२(ख) ॥

सुनु खगेस नहिं कछु रिषि दूषन। उर प्रेरक रघुबंस बिभूषन ॥
 कृपासिंधु मुनि मति करि भोरी। लीन्हि प्रेम परिच्छा मोरी ॥
 मन बच क्रम मोहि निज जन जाना। मुनि मति पुनि फेरी भगवाना ॥
 रिषि मम महत सीलता देखी। राम चरन बिस्वास बिसेषी ॥
 अति बिसमय पुनि पुनि पछिताई। सादर मुनि मोहि लीन्ह बोलाई ॥
 मम परितोष बिबिध बिधि कीन्हा। हरषित राममंत्र तब दीन्हा ॥
 बालकरूप राम कर ध्याना। कहेउ मोहि मुनि कृपानिधाना ॥
 सुंदर सुखद मिहि अति भावा। सो प्रथमहिं मैं तुम्हहि सुनावा ॥
 मुनि मोहि कछुक काल तहँ राखा। रामचरितमानस तब भाषा ॥
 सादर मोहि यह कथा सुनाई। पुनि बोले मुनि गिरा सुहाई ॥
 रामचरित सर गुप्त सुहावा। संभु प्रसाद तात मैं पावा ॥

तोहि निज भगत राम कर जानी। ताते मैं सब कहेउँ बखानी ॥
 राम भगति जिन्ह कें उर नाहीं। कबहुँ न तात कहिअ तिन्ह पाहीं ॥
 मुनि मोहि बिबिध भाँति समुझावा। मैं सप्रेम मुनि पद सिरु नावा ॥
 निज कर कमल परसि मम सीसा। हरषित आसिष दीन्ह मुनीसा ॥
 राम भगति अबिरल उर तोरें। बसिहि सदा प्रसाद अब मोरें ॥

दो. -सदा राम प्रिय होहु तुम्ह सुभ गुन भवन अमान।

कामरूप इच्छामरन ग्यान विराग निधान ॥ ११३(क) ॥

जेंहि आश्रम तुम्ह बसब पुनि सुमिरत श्रीभगवंत।

व्यापिहि तहँ न अबिद्या जोजन एक प्रजंत ॥ ११३(ख) ॥

काल कर्म गुन दोष सुभाऊ। कछु दुख तुम्हहि न व्यापिहि काऊ ॥
 राम रहस्य ललित बिधि नाना। गुप्त प्रगट इतिहास पुराना ॥
 विनु श्रम तुम्ह जानब सब सोऊ। नित नव नेह राम पद होऊ ॥
 जो इच्छा करिहहु मन माहीं। हरि प्रसाद कछु दुर्लभ नाहीं ॥
 सुनि मुनि आसिष सुनु मतिधीरा। ब्रह्मगिरा भइ गगन गँभीरा ॥
 एवमस्तु तव बच मुनि ग्यानी। यह मम भगत कर्म मन बानी ॥
 सुनि नभगिरा हरष मोहि भयऊ। प्रेम मगन सब संसय गयऊ ॥
 करि बिनती मुनि आयसु पाई। पद सरोज पुनि पुनि सिरु नाई ॥
 हरष सहित एहिं आश्रम आयउँ। प्रभु प्रसाद दुर्लभ बर पायउँ ॥
 इहाँ बसत मोहि सुनु खग ईसा। बीते कल्प सात अरु बीसा ॥
 करउँ सदा रघुपति गुन गाना। सादर सुनहिं बिहंग सुजाना ॥
 जब जब अवधपुरी रघुवीरा। धरहिं भगत हित मनुज सरीरा ॥
 तब तब जाइ राम पुर रहऊँ। सिसुलीला बिलोकि सुख लहऊँ ॥
 पुनि उर राखि राम सिसुरूपा। निज आश्रम आवउँ खगभूपा ॥
 कथा सकल मैं तुम्हहि सुनाई। काग देह जेंहि कारन पाई ॥
 कहिउँ तात सब प्रसन्न तुम्हारी। राम भगति महिमा अति भारी ॥

दो. ताते यह तन मोहि प्रिय भयउ राम पद नेह।

निज प्रभु दरसन पायउँ गए सकल संदेह ॥ ११४(क) ॥

मासपारायण, उन्तीसवाँ विश्राम

भगति पच्छ हठ करि रहेउँ दीन्हि महारिषि साप।

मुनि दुर्लभ बर पायउँ देखहु भजन प्रताप ॥ ११४(ख) ॥

जे असि भगति जानि परिहरहीं। केवल ग्यान हेतु श्रम करहीं ॥
 ते जड कामधेनु गृहँ त्यागी। खोजत आकु फिरहिँ पय लागी ॥
 सुनु खगोस हरि भगति बिहाई। जे सुख चाहहिँ आन उपाई ॥
 ते सठ महासिंधु बिनु तरनी। पैरि पार चाहहिँ जड करनी ॥
 सुनि भसुँडि के बचन भवानी। बोलेउ गरुड हरषि मृदु बानी ॥
 तव प्रसाद प्रभु मम उर माहीं। संसय सोक मोह भ्रम नाहीं ॥
 सुनेउँ पुनीत राम गुन ग्रामा। तुम्हरी कृपाँ लहेउँ विश्रामा ॥
 एक बात प्रभु पूँछउँ तोही। कहहु बुझाइ कृपानिधि मोही ॥
 कहहिँ संत मुनि वेद पुराना। नहिँ कछु दुर्लभ ग्यान समाना ॥
 सोइ मुनि तुम्ह सन कहेउ गोसाई। नहिँ आदरेहु भगति की नाई ॥
 ग्यानहिँ भगतिहिँ अंतर केता। सकल कहहु प्रभु कृपा निकेता ॥
 सुनि उरगारि बचन सुख माना। सादर बोलेउ काग सुजाना ॥
 भगतिहिँ ग्यानहिँ नहिँ कछु भेदा। उभय हरहिँ भव संभव खेदा ॥
 नाथ मुनीस कहहिँ कछु अंतर। सावधान सोउ सुनु बिहंगबर ॥
 ग्यान बिराग जोग बिग्याना। ए सब पुरुष सुनहु हरिजाना ॥
 पुरुष प्रताप प्रबल सब भाँती। अबला अबल सहज जड जाती ॥

दो. -पुरुष त्यागि सक नारिहिँ जो विरक्त मति धीर ॥

न तु कामी विषयाबस बिमुख जो पद रघुबीर ॥ ११५(क) ॥

सो. सोउ मुनि ग्याननिधान मृगनयनी विधु मुख निरखि।

बिबस होइ हरिजान नारि बिष्नु माया प्रगट ॥ ११५(ख) ॥

इहाँ न पच्छपात कछु राखउँ। वेद पुरान संत मत भाषउँ ॥
 मोह न नारि नारि केँ रूपा। पन्नगारि यह रीति अनूपा ॥
 माया भगति सुनहु तुम्ह दोऊ। नारि बर्ग जानइ सब कोऊ ॥
 पुनि रघुबीरहिँ भगति पिआरी। माया खलु नर्तकी बिचारी ॥
 भगतिहिँ सानुकूल रघुराया। ताते तेहिँ डरपति अति माया ॥
 राम भगति निरुपम निरुपाधी। बसइ जासु उर सदा अबाधी ॥
 तेहिँ बिलोकि माया सकुचाई। करि न सकइ कछु निज प्रभुताई ॥
 अस बिचारि जे मुनि बिग्यानी। जाचहीं भगति सकल सुख खानी ॥

दो. यह रहस्य रघुनाथ कर बेगि न जानइ कोइ ।
जो जानइ रघुपति कृपाँ सपनेहुँ मोह न होइ ॥ ११६(क) ॥
औरउ ग्यान भगति कर भेद सुनहु सुप्रवीन ।
जो सुनि होइ राम पद प्रीति सदा अविछीन ॥ ११६(ख) ॥

सुनहु तात यह अकथ कहानी । समुझत बनइ न जाइ बखानी ॥
ईस्वर अंस जीव अविनासी । चेतन अमल सहज सुख रासी ॥
सो मायाबस भयउ गोसाई । बँध्यो कीर मरकट की नाई ॥
जड चेतनहि ग्रंथि परि गई । जदपि मृषा छूटत कठिनई ॥
तब ते जीव भयउ संसारी । छूट न ग्रंथि न होइ सुखारी ॥
श्रुति पुरान बहु कहेउ उपाई । छूट न अधिक अधिक अरुझाई ॥
जीव हृदयँ तम मोह बिसेषी । ग्रंथि छूट किमि परइ न देखी ॥
अस संजोग ईस जब करई । तबहुँ कदाचित सो निरुअरई ॥
सात्त्विक श्रद्धा धेनु सुहाई । जौँ हरि कृपाँ हृदयँ बस आई ॥
जप तप ब्रत जम नियम अपारा । जे श्रुति कह सुभ धर्म अचारा ॥
तेइ तून हरित चरै जब गाई । भाव बच्छ सिसु पाइ पेन्हाई ॥
नोइ निवृत्ति पात्र बिस्वासा । निर्मल मन अहीर निज दासा ॥
परम धर्ममय पय दुहि भाई । अवटै अनल अकाम बिहाई ॥
तोष मरुत तब छमाँ जुडावै । धृति सम जावनु देइ जमावै ॥
मुदितौँ मथैँ बिचार मथानी । दम अधार रजु सत्य सुबानी ॥
तब मथि काटि लेइ नवनीता । बिमल विराग सुभग सुपुनीता ॥

दो. जोग अगिनि करि प्रगट तब कर्म सुभासुभ लाइ ।
बुद्धि सिरावैँ ग्यान घृत ममता मल जरि जाइ ॥ ११७(क) ॥
तब बिग्यानरूपिनि बुद्धि बिसद घृत पाइ ।
चित्त दिआ भरि धरै दृढ समता दिअटि बनाइ ॥ ११७(ख) ॥
तीनि अवरस्था तीनि गुन तेहि कपास तें काटि ।
तूल तुरीय सँवारि पुनि बाती करै सुगाटि ॥ ११७(ग) ॥

सो. एहि बिधि लेसै दीप तेज रासि बिग्यानमय ॥
जातहिँ जासु समीप जरहिँ मदादिक सलभ सब ॥ ११७(घ) ॥
सोहमस्मि इति वृत्ति अखंडा । दीप सिखा सोइ परम प्रचंडा ॥

आतम अनुभव सुख सुप्रकासा। तब भव मूल भेद भ्रम नासा ॥
 प्रबल अविद्या कर परिवारा। मोह आदि तम मिटइ अपारा ॥
 तब सोइ बुद्धि पाइ उँजिआरा। उर गृहँ बैठि ग्रंथि निरुआरा ॥
 छोरन ग्रंथि पाव जौँ सोई। तब यह जीव कृतारथ होई ॥
 छोरत ग्रंथि जानि खगराया। विघ्न अनेक करइ तब माया ॥
 रिद्धि सिद्धि प्रेरइ बहु भाई। बुद्धहि लोभ दिखावहिं आई ॥
 कल बल छल करि जाहिँ समीपा। अंचल बात बुझावहिँ दीपा ॥
 होइ बुद्धि जौँ परम सयानी। तिन्ह तन चितव न अनहित जानी ॥
 जौँ तेहि विघ्न बुद्धि नहिं बाधी। तौ बहोरि सुर करहिं उपाधी ॥
 इंद्रिँ द्वार झरोखा नाना। तहँ तहँ सुर बैठ करि थाना ॥
 आवत देखहिं विषय बयारी। ते हठि देही कपाट उघारी ॥
 जब सो प्रभंजन उर गृहँ जाई। तबहिं दीप विग्यान बुझाई ॥
 ग्रंथि न छूटि मिटा सो प्रकासा। बुद्धि विकल भइ विषय बतासा ॥
 इंद्रिन्ह सुरन्ह न ग्यान सोहाई। विषय भोग पर प्रीति सदाई ॥
 विषय समीर बुद्धि कृत भोरी। तेहि विधि दीप को बार बहोरी ॥

दो. तब फिरि जीव विविध विधि पावइ संसृति क्लेस।

हरि माया अति दुस्तर तरि न जाइ बिहगेस ॥ ११८(क) ॥

कहत कठिन समुझत कठिन साधन कठिन विवेक।

होइ घुनाच्छर न्याय जौँ पुनि प्रत्यूह अनेक ॥ ११८(ख) ॥

ग्यान पंथ कृपान कै धारा। परत खगेस होइ नहिं बारा ॥
 जो निर्बिघ्न पंथ निर्बहई। सो कैवल्य परम पद लहई ॥
 अति दुर्लभ कैवल्य परम पद। संत पुरान निगम आगम बद ॥
 राम भजत सोइ मुकुति गोसाई। अनइच्छित आवइ बरिआई ॥
 जिमि थल विनु जल रहि न सकाई। कोटि भाँति कोउ करै उपाई ॥
 तथा मोच्छ सुख सुनु खगराई। रहि न सकइ हरि भगति बिहाई ॥
 अस विचारि हरि भगत सयाने। मुक्ति निरादर भगति लुभाने ॥
 भगति करत विनु जतन प्रयासा। संसृति मूल अविद्या नासा ॥
 भोजन करिअ तृपिति हित लागी। जिमि सो असन पचवै जठरागी ॥
 असि हरिभगति सुगम सुखदाई। को अस मूढ न जाहि सोहाई ॥

दो. सेवक सेव्य भाव विनु भव न तरिअ उरगारि ॥

भजहु राम पद पंकज अस सिद्धांत विचारि ॥ ११९(क) ॥

जो चेतन कहँ जड़ करइ जड़हि करइ चैतन्य।

अस समर्थ रघुनायकहिँ भजहिँ जीव ते धन्य ॥ ११९(ख) ॥

कहेउँ ग्यान सिद्धांत बुझाई। सुनहु भगति मनि कै प्रभुताई ॥
 राम भगति चिंतामनि सुंदर। बसइ गरुड जाके उर अंतर ॥
 परम प्रकास रूप दिन राती। नहिँ कछु चहिअ दिआ घृत बाती ॥
 मोह दरिद्र निकट नहिँ आवा। लोभ बात नहिँ ताहि बुझावा ॥
 प्रबल अबिद्या तम मिटि जाई। हारहिँ सकल सलभ समुदाई ॥
 खल कामादि निकट नहिँ जाहीं। बसइ भगति जाके उर माहीं ॥
 गरल सुधासम अरि हित होई। तेहि मनि बिनु सुख पाव न कोई ॥
 ब्यापहिँ मानस रोग न भारी। जिन्ह के बस सब जीव दुखारी ॥
 राम भगति मनि उर बस जाके। दुख लवलेस न सपनेहुँ ताके ॥
 चतुर सिरामनि तेइ जग माहीं। जे मनि लागि सुजतन कराहीं ॥
 सो मनि जदपि प्रगट जग अहई। राम कृपा बिनु नहिँ कोउ लहई ॥
 सुगम उपाय पाइवे केरे। नर हतभाग्य देहिँ भटमेरे ॥
 पावन पर्वत बेद पुराना। राम कथा रुचिराकर नाना ॥
 मर्मी सज्जन सुमति कुदारी। ग्यान विराग नयन उरगारी ॥
 भाव सहित खोजइ जो प्राणी। पाव भगति मनि सब सुख खानी ॥
 मोरें मन प्रभु अस बिस्वासा। राम ते अधिक राम कर दासा ॥
 राम सिंधु घन सज्जन धीरा। चंदन तरु हरि संत समीरा ॥
 सब कर फल हरि भगति सुहाई। सो बिनु संत न काहुँ पाई ॥
 अस विचारि जोइ कर सतसंगा। राम भगति तेहि सुलभ बिहंगा ॥

दो. ब्रह्म पयोनिधि मंदर ग्यान संत सुर आहिं।

कथा सुधा मथि काढहिँ भगति मधुरता जाहिँ ॥ १२०(क) ॥

विरति चर्म असि ग्यान मद लोभ मोह रिपु मारि।

जय पाइअ सो हरि भगति देखु खगेस विचारि ॥ १२०(ख) ॥

पुनि सप्रेम बोलेउ खगराऊ। जौ कृपाल मोहि ऊपर भाऊ ॥

नाथ मोहि निज सेवक जानी। सप्त प्रस्न कहहु बखानी ॥

प्रथमहिँ कहहु नाथ मतिधीरा। सब ते दुर्लभ कवन सरीरा ॥

बड़ दुख कवन कवन सुख भारी। सोउ संछेपहि कहहु विचारी ॥
 संत असंत मरम तुम्ह जानहु। तिन्ह कर सहज सुभाव बखानहु ॥
 कवन पुन्य श्रुति बिदित बिसाला। कहहु कवन अघ परम कराला ॥
 मानस रोग कहहु समुझाई। तुम्ह सर्वग्य कृपा अधिकाई ॥
 तात सुनहु सादर अति प्रीती। मैं संछेप कहउँ यह नीती ॥
 नर तन सम नहि कवनिउ देही। जीव चराचर जाचत तेही ॥
 नरक स्वर्ग अपवर्ग निसेनी। ग्यान विराग भगति सुभ देनी ॥
 सो तनु धरि हरि भजहि न जे नर। होहि विषय रत मंद मंद तर ॥
 काँच किरिच बदलें ते लेही। कर ते डारि परस मनि देही ॥
 नहिं दरिद्र सम दुख जग माहीं। संत मिलन सम सुख जग नाहीं ॥
 पर उपकार बचन मन काया। संत सहज सुभाउ खगराया ॥
 संत सहहि दुख परहित लागी। परदुख हेतु असंत अभागी ॥
 भूर्ज तरू सम संत कृपाला। परहित निति सह बिपति बिसाला ॥
 सन इव खल पर बंधन करई। खाल कटाइ बिपति सहि मरई ॥
 खल बिनु स्वारथ पर अपकारी। अहि मूषक इव सुनु उरगारी ॥
 पर संपदा बिनासि नसाहीं। जिमि ससि हति हिम उपल बिलाहीं ॥
 दुष्ट उदय जग आरति हेतू। जथा प्रसिद्ध अधम ग्रह केतू ॥
 संत उदय संतत सुखकारी। बिस्व सुखद जिमि इंदु तमारी ॥
 परम धर्म श्रुति बिदित अहिंसा। पर निंदा सम अघ न गरीसा ॥
 हर गुर निंदक दादुर होई। जन्म सहस्र पाव तन सोई ॥
 द्विज निंदक बहु नरक भोगकरि। जग जनमइ बायस सरीर धरि ॥
 सुर श्रुति निंदक जे अभिमानी। रौरव नरक परहिं ते प्रानी ॥
 होहि उलूक संत निंदा रत। मोह निसा प्रिय ग्यान भानु गत ॥
 सब के निंदा जे जड करहीं। ते चमगादुर होइ अवतरहीं ॥
 सुनहु तात अब मानस रोगा। जिन्ह ते दुख पावहिं सब लोगा ॥
 मोह सकल ब्याधिन्ह कर मूला। तिन्ह ते पुनि उपजहिं बहु सूला ॥
 काम बात कफ लोभ अपारा। क्रोध पित्त नित छाती जारा ॥
 प्रीति करहिं जौं तीनिउ भाई। उपजइ सन्यपात दुखदाई ॥
 विषय मनोरथ दुर्गम नाना। ते सब सूल नाम को जाना ॥
 ममता दादु कंडु इरषाई। हरष बिषाद गरह बहुताई ॥
 पर सुख देखि जरनि सोइ छई। कुष्ट दुष्टता मन कुटिलई ॥

अहंकार अति दुखद डमरुआ। दंभ कपट मद मान नेहरुआ ॥
 तृष्णा उदरबृद्धि अति भारी। त्रिविध ईषना तरुन तिजारी ॥
 जुग विधि ज्वर मत्सर अबिबेका। कहँ लागि कहौँ कुरोग अनेका ॥

दो. एक व्याधि बस नर मरहिँ ए असाधि बहु व्याधि।
 पीडहिँ संतत जीव कहँ सो किमि लहै समाधि ॥ १२१(क) ॥

नेम धर्म आचार तप ग्यान जग्य जप दान।
 भेषज पुनि कोटिन्ह नहिँ रोग जाहिँ हरिजान ॥ १२१(ख) ॥

एहि विधि सकल जीव जग रोगी। सोक हरष भय प्रीति बियोगी ॥
 मानक रोग कछुक मैँ गाए। हहिँ सब कें लखि बिरलेन्ह पाए ॥
 जाने ते छीजहिँ कछु पापी। नास न पावहिँ जन परितापी ॥
 विषय कुपथ्य पाइ अंकुरे। मुनिहु हृदयँ का नर बापुरे ॥
 राम कृपाँ नासहिँ सब रोगा। जौँ एहिँ भाँति बनै संयोगा ॥
 सदगुर बैद बचन बिस्वासा। संजम यह न विषय कै आसा ॥
 रघुपति भगति सजीवन मूरी। अनूपान श्रद्धा मति पूरी ॥
 एहि विधि भलेहिँ सो रोग नसाहीं। नाहिँ त जतन कोटि नहिँ जाहीं ॥
 जानिअ तब मन बिरुज गोसाँई। जब उर बल बिराग अधिकाई ॥
 सुमति छुधा बाढइ नित नई। विषय आस दुर्बलता गई ॥
 विमल ग्यान जल जब सो नहाई। तब रह राम भगति उर छाई ॥
 सिव अज सुक सनकादिक नारद। जे मुनि ब्रह्म बिचार बिसारद ॥
 सब कर मत खगनायक एहा। करिअ राम पद पंकज नेहा ॥
 श्रुति पुरान सब ग्रंथ कहाहीं। रघुपति भगति बिना सुख नाहीं ॥
 कमठ पीठ जामहिँ बरु बारा। बंध्या सुत बरु काहुहिँ मारा ॥
 फूलहिँ नभ बरु बहुविधि फूला। जीव न लह सुख हरि प्रतिकूला ॥
 तृषा जाइ बरु मृगजल पाना। बरु जामहिँ सस सीस बिषाना ॥
 अंधकारु बरु रबिहिँ नसावै। राम बिमुख न जीव सुख पावै ॥
 हिम ते अनल प्रगट बरु होई। बिमुख राम सुख पाव न कोई ॥
 दो०=बारि मथें घृत होइ बरु सिकता ते बरु तेल।

बिनु हरि भजन न भव तरिअ यह सिद्धांत अपेल ॥ १२२(क) ॥

मसकहिँ करइ विरंचि प्रभु अजहिँ मसक ते हीन।

अस विचारि तजि संसय रामहि भजहि प्रवीन ॥ १२२(ख) ॥

श्लोक- विनिच्छ्रतं वदामि ते न अन्यथा वचांसि मे।

हरि नरा भजन्ति येऽतिदुस्तरं तरन्ति ते ॥ १२२(ग) ॥

कहेउँ नाथ हरि चरित अनूपा। ब्यास समास स्वमति अनुरुपा ॥
श्रुति सिद्धांत इहइ उरगारी। राम भजिअ सब काज बिसारी ॥
प्रभु रघुपति तजि सेइअ काही। मोहि से सठ पर ममता जाही ॥
तुम्ह विग्यानरूप नहिं मोहा। नाथ कीन्हि मो पर अति छोहा ॥
पूछिहुँ राम कथा अति पावनि। सुक सनकादि संभु मन भावनि ॥
सत संगति दुर्लभ संसारा। निमिष दंड भरि एकउ बारा ॥
देखु गरुड निज हृदयँ विचारी। मैं रघुबीर भजन अधिकारी ॥
सकुनाधम सब भाँति अपावन। प्रभु मोहि कीन्ह बिदित जग पावन ॥

दो. आजु धन्य मैं धन्य अति जद्यपि सब विधि हीन।

निज जन जानि राम मोहि संत समागम दीन ॥ १२३(क) ॥

नाथ जथामति भाषेउँ राखेउँ नहिं कलु गोइ।

चरित सिंधु रघुनायक थाह कि पावइ कोइ ॥ १२३ ॥

सुमिरि राम के गुन गन नाना। पुनि पुनि हरष भुसुंछि सुजाना ॥
महिमा निगम नेति करि गाई। अतुलित बल प्रताप प्रभुताई ॥
सिव अज पूज्य चरन रघुराई। मो पर कृपा परम मृदुलाई ॥
अस सुभाउ कहुँ सुनउँ न देखउँ। केहि खगेस रघुपति सम लेखउँ ॥
साधक सिद्ध विमुक्त उदासी। कवि कोबिद कृतग्य संन्यासी ॥
जोगी सूर सुतापस ग्यानी। धर्म निरत पंडित विग्यानी ॥
तरहिं न बिनु सीं मम स्वामी। राम नमामि नमामि नमामी ॥
सरन गएँ मो से अघ रासी। होहिं सुद्ध नमामि अविनासी ॥

दो. जासु नाम भव भेषज हरन घोर त्रय सूल।

सो कृपालु मोहि तो पर सदा रहउ अनुकूल ॥ १२४(क) ॥

सुनि भुसुंछि के बचन सुभ देखि राम पद नेह।

बोलेउ प्रेम सहित गिरा गरुड बिगत संदेह ॥ १२४(ख) ॥

मै कृत्कृत्य भयउँ तव बानी। सुनि रघुबीर भगति रस सानी ॥

राम चरन नूतन रति भई। माया जनित विपति सब गई ॥
 मोह जलधि बोहित तुम्ह भए। मो कहँ नाथ विविध सुख दए ॥
 मो पहिं होइ न प्रति उपकारा। बंदउँ तव पद बारहिं बारा ॥
 पूरन काम राम अनुरागी। तुम्ह सम तात न कोउ बडभागी ॥
 संत बिटप सरिता गिरि धरनी। पर हित हेतु सबन्ह कै करनी ॥
 संत हृदय नवनीत समाना। कहा कबिन्ह परि कहै न जाना ॥
 निज परिताप द्रवइ नवनीता। पर दुख द्रवहिं संत सुपुनीता ॥
 जीवन जन्म सुफल मम भयऊ। तव प्रसाद संसय सब गयऊ ॥
 जानेहु सदा मोहि निज किंकर। पुनि पुनि उमा कहइ बिहंगबर ॥

दो. तासु चरन सिरु नाइ करि प्रेम सहित मतिधीर।

गयउ गरुड बैकुंठ तव हृदयँ राखि रघुवीर ॥ १२५(क) ॥

गिरिजा संत समागम सम न लाभ कछु आन।

बिनु हरि कृपा न होइ सो गावहिं वेद पुरान ॥ १२५(ख) ॥

कहेउँ परम पुनीत इतिहासा। सुनत श्रवन छूटहिं भव पासा ॥
 प्रनत कल्पतरु करुना पुंजा। उपजइ प्रीति राम पद कंजा ॥
 मन क्रम बचन जनित अघ जाई। सुनहिं जे कथा श्रवन मन लाई ॥
 तीर्थाटन साधन समुदाई। जोग बिराग ग्यान निपुनाई ॥
 नाना कर्म धर्म ब्रत दाना। संजम दम जप तप मख नाना ॥
 भूत दया द्विज गुर सेवकाई। विद्या विनय विवेक बडाई ॥
 जहँ लागि साधन बेद बखानी। सब कर फल हरि भगति भवानी ॥
 सो रघुनाथ भगति श्रुति गाई। राम कृपाँ काहँ एक पाई ॥

दो. मुनि दुर्लभ हरि भगति नर पावहिं विनहिं प्रयास।

जे यह कथा निरंतर सुनहिं मानि बिस्वास ॥ १२६ ॥

सोइ सर्वग्य गुनी सोइ ग्याता। सोइ महि मंडित पंडित दाता ॥
 धर्म परायन सोइ कुल त्राता। राम चरन जा कर मन राता ॥
 नीति निपुन सोइ परम सयाना। श्रुति सिद्धांत नीक तेहिं जाना ॥
 सोइ कवि कोविद सोइ रनधीरा। जो छल छाडि भजइ रघुवीरा ॥
 धन्य देस सो जहँ सुरसरी। धन्य नारि पतिब्रत अनुसरी ॥
 धन्य सो भूपु नीति जो करई। धन्य सो द्विज निज धर्म न टरई ॥

सो धन धन्य प्रथम गति जाकी। धन्य पुन्य रत मति सोइ पाकी ॥
धन्य घरी सोइ जब सतसंगा। धन्य जन्म द्विज भगति अभंगा ॥

दो. सो कुल धन्य उमा सुनु जगत पूज्य सुपुनीत।
श्रीरघुवीर परायन जेहि नर उपज विनीत ॥ १२७ ॥

मति अनुरूप कथा मैं भाषी। जद्यपि प्रथम गुप्त करि राखी ॥
तव मन प्रीति देखि अधिकारि। तव मैं रघुपति कथा सुनाई ॥
यह न कहिअ सठही हठसीलहि। जो मन लाइ न सुन हरि लीलहि ॥
कहिअ न लोभिहि क्रोधहि कामिहि। जो न भजइ सचराचर स्वामिहि ॥
द्विज द्रोहिहि न सुनाइअ कबहूँ। सुरपति सरिस होइ नृप जबहूँ ॥
राम कथा के तेइ अधिकारी। जिन्ह कें सतसंगति अति प्यारी ॥
गुर पद प्रीति नीति रत जेई। द्विज सेवक अधिकारी तेई ॥
ता कहँ यह बिसेष सुखदाई। जाहि प्रानप्रिय श्रीरघुराई ॥

दो. राम चरन रति जो चह अथवा पद निर्बान।
भाव सहित सो यह कथा करउ श्रवन पुट पान ॥ १२८ ॥

राम कथा गिरिजा मैं बरनी। कलि मल समनि मनोमल हरनी ॥
संसृति रोग सजीवन मूरी। राम कथा गावहिं श्रुति सूरी ॥
एहि महँ रुचिर सप्त सोपाना। रघुपति भगति केर पंथाना ॥
अति हरि कृपा जाहि पर होई। पाउँ देइ एहि मारग सोई ॥
मन कामना सिद्धि नर पावा। जे यह कथा कपट तजि गावा ॥
कहहिं सुनहिं अनुमोदन करहीं। ते गोपद इव भवनिधि तरहीं ॥
सुनि सब कथा हृदयँ अति भाई। गिरिजा बोली गिरा सुहाई ॥
नाथ कृपाँ मम गत संदेहा। राम चरन उपजेउ नव नेहा ॥

दो. मैं कृतकृत्य भइउँ अब तव प्रसाद बिस्वेस।
उपजी राम भगति दृढ बीते सकल कलेस ॥ १२९ ॥

यह सुभ संभु उमा संबादा। सुख संपादन समन बिषादा ॥
भव भंजन गंजन संदेहा। जन रंजन सज्जन प्रिय एहा ॥
राम उपासक जे जग माहीं। एहि सम प्रिय तिन्ह के कछु नाहीं ॥
रघुपति कृपाँ जथामति गावा। मैं यह पावन चरित सुहावा ॥
एहिं कलिकाल न साधन दूजा। जोग जग्य जप तप ब्रत पूजा ॥

रामहि सुमिरिअ गाइअ रामहि । संतत सुनिअ राम गुन ग्रामहि ॥
जासु पतित पावन बड बाना । गावहिं कवि श्रुति संत पुराना ॥
ताहि भजहि मन तजि कुटिलाई । राम भजें गति केहिं नहिं पाई ॥

छं. पाई न केहिं गति पतित पावन राम भजि सुनु सठ मना ।
गनिका अजामिल ब्याध गीध गजादि खल तारे घना ॥
आभीर जमन किरात खस स्वपचादि अति अधरूप जे ।
कहि नाम बारक तेपि पावन होहिं राम नमामि ते ॥ १ ॥

रघुवंस भूषन चरित यह नर कहहिं सुनिहिं जे गावहीं ।
कलि मल मनोमल धोइ विनु श्रम राम धाम सिधावहीं ॥
सत पंच चौपाई मनोहर जानि जो नर उर धरै ।
दारुन अबिद्या पंच जनित विकार श्रीरघुवर हरै ॥ २ ॥

सुंदर सुजान कृपा निधान अनाथ पर कर प्रीति जो ।
सो एक राम अकाम हित निर्बानप्रद सम आन को ॥
जाकी कृपा लवलेस ते मतिमंद तुलसीदासहूँ ।
पायो परम विश्रामु राम समान प्रभु नाहीं कहूँ ॥ ३ ॥

दो. मो सम दीन न दीन हित तुम्ह समान रघुवीर ।
अस विचारि रघुवंस मनि हरहु विषम भव भीर ॥ १३०(क) ॥
कामिहि नारि पिआरि जिमि लोभहि प्रिय जिमि दाम ।
तिमि रघुनाथ निरंतर प्रिय लागहु मोहि राम ॥ १३०(ख) ॥

श्लोक-यत्पूर्व प्रभुणा कृतं सुकविना श्रीशम्भुना दुर्गमं
श्रीमद्रामपदाब्जभक्तिमनिशं प्राप्त्यै तु रामायणम् ।
मत्वा तद्रघुनाथमनिरतं स्वान्तस्तमःशान्तये
भाषाबद्धमिदं चकार तुलसीदासस्तथा मानसम् ॥ १ ॥

पुण्यं पापहरं सदा शिवकरं विज्ञानभक्तिप्रदं
मायामोहमलापहं सुविमलं प्रेमाम्बुपूरं शुभम् ।
श्रीमद्रामचरित्रमानसमिदं भक्त्यावगाहन्ति ये
ते संसारपतङ्गघोरकिरणैर्दहन्ति नो मानवाः ॥ २ ॥

मासपारायण, तीसवाँ विश्राम

नवान्हपारायण, नवाँ विश्राम

इति श्रीमद्रामचरितमानसे सकलकलिकलुषविध्वंसने
सप्तमः सोपानः समाप्तः ।
(उत्तरकाण्ड समाप्त)

आरति श्रीरामायनजी की। कीरति कलित ललित सिय पी की ॥
गावत ब्रह्मादिक मुनि नारद। बालमीक विग्यान बिसारद।
सुक सनकादि सेष अरु सारद। बरनि पवनसुत कीरति नीकी ॥ १ ॥
गावत बेद पुरान अष्टदस। छओ सास्त्र सब ग्रंथन को रस।
मुनि जन धन संतन को सरबस। सार अंस संमत सबही की ॥ २ ॥
गावत संतत संभु भवानी। अरु घटसंभव मुनि विग्यानी।
ब्यास आदि कबिबर्ज बखानी। कागभुसुंङि गरुड के ही की ॥ ३ ॥
कलिमल हरनि बिषय रस फीकी। सुभग सिंगार मुक्ति जुबती की।
दलन रोग भव मूरि अमी की। तात मात सब बिधि तुलसी की ॥ ४ ॥

.. Shri Ram Charit Manas ..

Searchable pdf was typeset using XeTeXgenerateactualtext feature of Xe_{La}TeX 0.99996

on August 20, 2017

Please send corrections to sanskrit@cheerful.com

